

四庫全書

集部

欽定四庫全書

集部

文忠集卷三

詳校官庶吉士_臣李傳熊

主事_臣呂雲棟覆勘

總校官進士_臣楊懋珩

校對官學正_臣李巖

謄錄監生_臣于時和

欽定四庫全書

文忠集卷一

省齋文集一

宋 周必大 撰

古律詩五十四首

起紹興辛酉止紹興己卯

章貢

廬陵

平江

金陵

送陸先生聖修

府

赴春闈

紹興辛酉冬

送君南浦慘離情握手依依數去程日薄雲濃風轉勁
江寒水落浪還生此時執別仙舟穩後夜相思山月明
好把嘉謀獻丹宸中興天子急昇平

贛江 甲子

跡落蠻夷地艱危分飽經盤渦隨櫂舞驚浪濺船零石
亂舟才過峯回眼謾青晚來荒浦宿愁緒轉冥冥

留題文氏雙秀亭三首 庚子

身在江湖欲看山山行還憶弄潺湲誰知裏許雙竒絕
碧玉青螺一望間

汀蘭烟樹兩佳哉六曲屏幃坐上開南浦彩雲飛盡棟
西山爽氣在朝來

澄碧修眉固自奇，只愁門外苦喧卑。
要知心跡雙清處，須待人稀月上時。
亭近市

彭永州夫人挽詞

庚午

夢虺端由慶閼鍾，采蘋來助大夫共。
化行閨壺衣無綠，行應箴圖管有彤。
石窈方新湯沐邑，黃垆俄掩斧堂封。
不須更續更生傳，自有豐碑記肅雍。
彭自為埋銘

道中憶胡季懷

壬申

珍重臨分白玉卮，醉中那暇說相思。
天寒道遠酒醒處，

始是憶君腸斷時

舟行憶永和兄弟

癸酉

一掛吳帆不計程
幾回繫纜幾回行
天寒有日雲猶凍
江濶無風浪亦生
數點家山常在眼
一聲寒鴈正關情
長年忽得南來鯉
恐有音書急遣烹

抵蘇臺寄李懷

癸酉

江浙相望寄此身
臨風回首嘆離羣
吳雲目斷君思我
楚樹天遙我憶君
別後酒尊應獨酌
舊時棋局對誰分

狂言欲吐還須茹俗子紛紛可得聞

次韻王仲謨仲寧唱酬二首

甲戌

公子翩翩正妙年修能誇節本天然弟兄况自逢三益
事業懸知定十全厚意綢繆華映鄂新詩綺麗月流天
乘黃驟耳方爭駿應笑駑駘強自鞭

別日無多似隔年每逢佳句輒欣然詞傾江漢無留礙
語轉珠璣更渾全目共荆谿千里月人居吳郡五湖天
興來儻有山陰作即上扁舟往執鞭

和仲寧中秋赴飲莊宅

甲戌

方訝頑陰蔽月堂坐看涼吹動枯腸疾驅雲陣千重翳
盡放冰輪萬丈光莫問蚌珠圓合浦且聽羯鼓打西涼

踈狂似我何須撓撓取吹笙玉節郎

來詩有妙曲
撓周郎之句

羅主簿妻朱氏挽詞二首

甲戌

早歲從孫寶中年訓孟軻節高資內助機斷激儒歌枳
棘鸞先逝雲霄鶚正摩即看膺命服何遽掩卷阿

素幕帷堂日青烏甫窳時薤凝朝露冷樹動晚風悲七

十年無憾平生壺有儀孝哉難與穀猶慟蓼莪詩

送趙富文彥博倅洪州三首

丙子

期集分携五載前衝泥各上浙江船如今再贈城南柳

依舊黃梅夜雨天

辛未四月晦團司結局
今復以是日送君行

花發河陽政早成策勲恩擢佐藩臣鷄翹豹尾他年從

且作銀章第一人

同年四百人
朱紱自公始

南浦飛雲繞棟桴西山爽氣入魚須公庭吏散文書靜

許我他時解榻無

次韻丁維臯糧料

幘

牡丹未開

戊寅三月

拙速那能闢巧遲從教綠暗與紅稀天香未染蜂猶懶

日幄先籠蝶已飛

羅鄴牡丹詩云落盡春紅始見花幄籠輕日護香霞又李正封詩云國色

朝酣酒天香夜染衣

羯鼓只應催上苑鶴林誰復倩紅衣請君多

釀淮南米縱賞先拚倒載歸

適蒙折簡見約烹茶再次前韻

戊寅

清明過後日初遲春服成時瑟漸希浪藥慙隨流水遠

名花獨待羽觴飛催開已奏清平調

李太白清平調三章正為牡丹

唱

徹猶須金縷衣活火新泉太清絕何如沉醉詠而歸

次韻白蓮

戊寅

汙溝濁水葉田田又見新栽京府蓮

見樂天詩

玉井謾傳青

壁外雪膚如在射山前泛紅入幕王家俗種白開池陸
子賢不用若耶溪畔女蘭橈夜採月娟娟

次韻紅白蓮間生

戊寅五月

閒花不遣倚門牆獨挹芙蕖冉冉香艷質施朱窺宋玉
冰姿傳粉試何郎青莖翠蓋元相映縞袂霞裾各自芳

聞道金鑾行豹直炬蓮先已兆嘉祥

次韻秋日禪房

戊寅

官閒未覺往來妨踈懶從公意自長松栢有心寒始見
芝蘭入室久彌香送秋容我無何飲畦夏憐渠有底忙
霜倒池蓮雨荒菊禪房真似贊公房

次韻沈世德

作式

撫幹川詠軒

戊寅六月十三日

江山脩清麗雲月助色澤向來面面景今日誰洗滌主
人倚晴檻回首笑謂客府公實知已餘事懶經畫悵懨懨

廊大厦軒牕開澤國架簷逼象緯植礎壓鹵斥仰看天
宇大俯覺地軸窄端如倩巨靈妙手重開闢此興固非
淺無入不自適華闕望中敞棠陰坐上得波光動藻井
帆影落几席所欣魚依蒲未許蝎見壁陰晴及朝暮氣
象知幾易飈回有餘韻烏度無留迹市聲沉浩浩漁唱
聞昔昔油幕多風流翛然晉八伯淋漓傳翰墨鏃擊間
金石連璧喜同志倚玉許涼德頗慙陂量容未忍俗駕
勒惡詩信非脩勿作春秋責

又次韻二首

戊寅

川流元滾滾客至喜津津卜築新形勢逢迎舊主人酒
杯容我醉詩句味君醇大隱聊城市巖耕笑子真

宮槐分影直官柳着行疎畫棟飛翬遠晴霞散綺餘池
邀山簡馬水勝武昌魚只恐封泥召驂鸞上帝居

又次韻醵飲

戊寅

層軒發天藏初日照粉牕

韓退之高
門塗粉牕

雄觀跨鵬背煩促

陋蠶箔飛綏會蘭亭傳觴寫桑落飲興江海窄逸氣雲

天薄雖無漢侯鯖粗勝周禮醪清歡謝絲竹賀厦驚燕
雀圍棋角勝負獻俳紛戲謔涼風徧廣坐長夏失重熇
柳文赫
炎重熇高會方繼日初筵今告朔要令四難并詎止一

餉樂明朝停絕唱百年無此作薦聞須狗監賡絕愧鼠
璞今王馳蒲輪之子尚蓮幕行參瑚璉用歸助棟梁託
謂沈
相讀書照青藜視草詠紅藥回顧廣文寒莫忘鷄黍約

次韻趙公直賞心亭醪會古風

戊寅六月
二十三日

晉人誇新亭假日輒高會中間伯仁輩未免楚囚對江

山猶古昔人物已曖昧東郊今保釐翠華記行在佳麗
壓淮楚追遊盛冠蓋茲樓貫城雉于邁無小大令威雖
不歸

謂丁叔亭

靈光故無礙烟雲互明滅川郭相映帶當年

烏衣游此日思一槩從容值休沐登臨多慷慨幽懷忽
軒豁細故絕芥蒂已尋詩社盟更許食期戒佳賓滿座
上好語來天外舟移白鷺

洲名

遠目送飛鳥快方種淵明

林粗免監河貸一醉儻可期與君時倒載

送鄭漕

根

移帥揚州二首

戊寅八月二十五日

碧幢紅旆擁西風幾點淮山落眼中卧轍正看留使者
褰帷早已識元戎兒童騎馬迎并牧父老封棠記召公
人望汲御居禁闥淮揚只恐又怱怱

聞道維揚地望雄風流人物似江東六龍前日臨淮海
五馬由來說醉翁壁月幾橋留夜色珠簾十里待春風
遙知九日平山會笑揷茱萸滿鬢紅

送葛謙問

郊

運幹

戊寅九月
十一日

少年扶犁事西疇老陪英游帝王州才高韻勝各有得

志合情親君更優離筵忽席洛定鼎伐期云畢齊葵丘
君行共歎空冀北我衰謾作周南留欲持菊觴止君飲
單車已戒難停輶欲挽長條贈君別金城柳落空悲秋
悲秋惜別置勿道資望久合登瀛洲仙凡一隔在何許
指點蓬萊雲氣浮

送毛平仲

并

戊寅十一月十四日

平仲學士隱居鄉閭而雋聲震于四方竭來陪京衣
冠傾慕焉僕之大父與先尚書同為庚辰進士平仲

于僕又有十年之長方將兄事而強附之則聞歸艤
在岸矣敬贈惡詩既叙先契且約後會云

父祖同登六十春相逢草草大江濱
羨君不使囊錐見笑我空將芟製焚
聞道都人時載酒未容俗客細論文
他年小築柯山畔泉石風光賸欲分

次韻邢懷正

孝庸

通判遊蔣山

戊寅十二月十八日

仙人薄蓬萊乘槎度河許舊觀桑田變
今訪鍾山古駕言出東門恍若之帝所
朝曦霽青霜楓葉落紅雨亭亭

望浮圖隱隱挿天宇坡垂北溟黿石卧南山虎遙聞飯
後鐘絕勝紈如鼓恭惟布金地草木誰敢侮孤芳破冰
雪喜見梅萼吐同遊皆大雅緇素競先睹巾車似元亮
漱石雜孫楚相將挹靈泉何用照牛渚西方化人國未
覺道修阻法筵盛龍象一一會心侶茗盃散午夢蒲團
便平聲軟語懸知雨花社重辨風幡舞相投甚針芥味道
真酪乳從來草堂靈俗駕回吾祖況如雲仍輩么麼那
復數後車倘許隨未羨黃金塢

次韻周德友

祁

運幹

戊寅十二月十七日

曾見麻姑過蔡經却陪王導宴新亭博文正自鄙木彊
操論未應談竹形入幕久依池水綠讀書行照杖藜青

篋中知有還丹在不用臨溪憐鬢星

少荅鶴髮之句又德友昨日以蘇養

直詩帖百餘紙相示世傳養直遇仙故用麻姑并還丹事

送蔡德輝

理

教授三首

己卯四月十四日

天馬元從西極來頻年伏櫪伴駑駘如今始覺升沉異
萬里追風道路開

曉折臺城楊柳枝夕登瓜步佛狸祠請君收拾江山助
歸和薰風殿閣詩

幾回送客大江頭今渡江頭特地愁豈是陽關動淒怨
同僚情分正綢繆

送徐漕

度

移憲浙東二首

己卯四月
二十二日

一去中臺十九年愛君憂國得華顛久疑使節留江上

稍喜除書近日邊寒碧軒牕餘舊句

公于漕臺創寒碧
軒且賦長句命同

僚屬

汗青簡冊奏新篇

公著國紀以續通
鑑方繕寫進御

文章入相公

家舊沙路從今穩着鞭

滿歲蹢躅泮水間獨公不作腐儒看幾陪佳客芙蓉幕
聊慰窮愁苜蓿槃此去高山空自仰向來流水為誰彈
割鞭截鐙知無益但覺輪囷激肺肝

送子開弟還江西二十韻

己卯四月二十八日

十年樂家居豈知離別愁言遊冠蓋場聚散靡自由子
從何方來訪我金陵州情多語反默喜極涕翻流不如
並轡出庶以寫我憂沉沉長干寺南軒清且幽烏衣訪

王謝湮滅那可求却登覽輝亭下瞰白鷺洲羣山競合
沓萬室相牽鈎回首指鍾阜黎明戒前騶林泉與臺殿
勝處皆窮搜紛紛六朝舊莽莽今幾邱弔古轍未環劇
談興方稠胡為理書劍復欲從遠遊蹉跎六年別邂逅
半月留臨分敢不盡苦語誠非偷期子如良農勤勤事
西疇慎勿因水旱而令廢鋤耰豐歲會可必行行真有
秋十月風霜動待子江之頭

送張端明

燾

赴召

己卯五月二十二日

某伏承某官節召還朝闔府士民稱頌盛德如出一
口某以年家子門下士而承泮宮之乏倘暗無詩歌
人謂斯何謹採輿言為口號十首辭雖俚而事則實
意雖淺而情則深冒瀆威嚴不寒而慄

春殿曾收最上科甘泉扈駕早鳴珂金陵已奏三年課
玉燭宜調四氣和

家傳圯上一編書二紀論思只緒餘此去籌帷方倚重
赤松那得便從渠

歸粟招提刻翠珉流傳絕域歎名臣今聞整轡登廊廟
應有先聲警四隣

宣和末公施米虹縣之僧寺刻石以
記金人過之歎服其德具寺賴以不

毀

管齋分來二十年何人從此得朝天介圭入覲由公始

莫把題名取次鐫

紹興八年始以府帥兼司留鑰
今已十年餘政未有被召者

曾以詩書化蜀人更恢文教大江垠諸生亦有如何武

爭詠三章轉上聞

心正能教筆不歌古來書法獨公知顏筋柳骨留蕭寺

總是甘棠去後思

尺一催歸侍冕旒
邦人無路上前驕
却因遙祝南山壽
小作臺城十日留

延英引對寵章新
都下傳觀拜輔臣
沙路緩驅金騶裏
閣間新上玉麒麟

公門如海亦如龍
解榻鈴齋獨見容
慚愧深知何以報
歲寒千尺澗邊松

欲驅羸馬從金鞍
願藉微官進自難
但願斯民均暖律

小儒不歎廣文寒

送沈世德撫幹還朝

己卯五月

元戎已趣曹裝覲上客難教儉幕留積雨半篙生別浦
清風十幅送歸舟槐庭袞繡行虞侍芸閣鉛黃待校讎
池有遊鱗雲有鴈尺書能寄故人不

次韻徽州胡推官

璉

旅中遇雪且約同登雨花

臺三首

己卯十二月

歲晚相逢古帝鄉長松百尺傲冰霜青鞋踏遍江南岸

更賦名花似漫郎

傳道詩仙折簡來
破寒雪屋為君開
要將好句誇張籍
故放歌謠吏部才

天女來參彼上人
逆知君動雨花心
故令六出繽紛下
免使荒臺更重臨

方孺人挽詞

干之後王和甫
外孫 己卯

處士詩名滿古今
外家文采切星辰
中郎有女曾傳業
武子趨庭更慰人
諼草正開堂北向
扶桑莫返日西淪

可憐寂寞湘江路
磷走螢飛翠栢新

文忠集卷一

欽定四庫全書

文忠集卷二

省齋文藁二

宋 周必大 撰

古律詩六十一首

起紹興庚辰止紹興壬午
金陵 臨安

送別邢懷正直閣赴江西提舉二首

庚辰
二月

大江西畔米流脂
斂散新陳倚繡衣
旗展春山千嶺暗
霜飛暑路萬艘歸
朝家法備農商信
臺府官閒案牘稀
廬阜虎溪天下景
未妨行部款禪扉

二年踈懶累深知喜見皇華授節時歸里欲依東道主
登畿却負北山移黃間遙想前驅弩白下空攀遠別枝
坐闕未溫公入覲却從南蕩候旌麾

留別金陵韓帥

仲通

二首

庚辰三月

十二鱗符玉絕肪腰間仍映帶圍黃化行江國春常早
訟息堦除日自長槐影緩趨三接畫棠陰先滿十連堂
子淵去踏長安道待賦中和奏未央

再點賓筵又一期千金敝帚賴提撕泮宮正采僖侯藻

太學俄甘吏部薈人似塞鴻春向北心隨江水日朝西
太平勲業須公助不用頻年戀節犀

留別蘇仁仲通判

庚辰

公才豈合尚題輿天遣寒儒此曳裾
午夜燈光曾共賞三春樂事未全踈
尊前窈窕傳新唱耳畔瀾翻聽異書
此別不須勤怨惜君王日日問嚴徐

九日哭子柔弟

庚辰

自酌黃花酒心酸苦淚零常時愛鳴鴈
從此不堪聽

劉韶美監丞以予發策玉堂小詩送筆墨云腹
囊英物吐長虹翰墨區區有底功也要同盟

作旗鼓三山直上一帆風走筆次韻時在雨

中

庚辰九月
二十一日

今雨驚呼未霽虹筆精墨妙策新功要令快草三千牘
故借冷然九萬風

次韻程泰之正字奉祠惠照院詠雪五首

辛巳
正月

八
日

天女飛花現化城
禪房深處想神清
齋心正使無低唱
擁鼻何妨效洛生

造化平心混萬殊
高低一色眩離朱
如何尚愛南枝瘦
偏以凝脂助曼膚

方丈仙人定好奇
行吟合璧作瓊蕤
兔園且就如今賦

鳳沼重看異日詩

瓊蕤見
文選

叨燥誰濡翰墨場
絕思齒頰漱甘芳
粉身莫惜歸湯鼎
要與團龍發暗香

剥啄朝來送好音
唱妍酬麗自書林
柴門未掃簷垂溜
筆退誰知抱膝吟

胡原仲

憲

正字特改官除宮觀中置酒餞別會

者七人以先生早賦歸去來為韻人各賦一

首僕得早字

辛巳正月

西伯王業興海濱歸二老漢家念羽翼坐致商山皓
恭惟陛下聖尊德繼雍鎬先生學孔孟不但遺編抱致身
雖苦晚聞道固已早昨隨弓旌召着脚歷蓬島夜陪藜

杖青朝奏囊封皂第令坐臺閣不减照乘寶思歸獨何
事起為子規惱祠官厚稟假命秩畧資考恩榮固無愧
出處吾有道漫漫七閩路去去春風好都門送別處懷
抱要傾倒相思常情耳再拜請善禱臨雍有故事乞言
非草草指期裏蒲輪未可迹如掃

送光祿寺丞李德遠得請奉祠

辛巳二月

君家臨川我廬陵兩郡相望宜相親長安城中初結綬
石灰橋畔還卜隣扣門問道日不足篝燈夜照論心曲

寸筵那許撞洪鐘
跛鼈逝將隨驥跡
聞君上書苦求歸
君今豈是當歸時
滿朝留君君不顧
我雖歎息何能為
莫攀楊柳濤江岸
莫唱陽關動淒斷
行行但祝加餐飯
潮落風生牢繫纜

次韻史院洪景廬檢詳館中紅梅

辛巳

紅羅亭深宮漏遲
宮花四面誰得知

南唐苑中有紅羅亭四面專植紅梅

見雜志

蓬山移植自何世
國色含酒紛滿枝
初疑太真欲

起舞霓裳拂飾天
然姿又如東家窺
墻女施朱映粉尤

相宜不然朝雲頻薄怒自持似對襄王時須臾燕支着
雨落整裝俯照含風漪遊蜂戲蝶日採掇嗟爾何異氓
之蚩提壺火急就公飲他日墮馬空啼眉

次韻王龜齡大著省中黃梅

辛巳

化工未幻酴醾菊先放細梅伴羣玉幽姿着意慕鉛黃
正色何心輕萼綠粧成自淺風味深對此寧辭食無肉

可憐涪翁被渠惱中歲梅屏杯杓醪

省中黃梅在酴醾之側黃魯直戲答

正觀復酴醾菊詩云誰將陶
令黃金菊幻作酴醾白玉花

送王嘉叟編修通判洪州

辛巳三月

籍甚西樞椽居然出處光人猶思賀監天未起張良南

浦雲應碧東湖柳正黃古來求別駕不是薄星郎

王名
拒賀

允中薦以上書薦張和公補外

崔祐甫自吏部郎求洪州別駕

送王龜齡赴越州宗丞

辛巳五月

冊府號冀北一時聚奇材嗟我雖未至尚及相追陪胡
子真老驥元章蓋龍媒爾來厭名韁蹙蹙游九垓王子
乃汗血疑是西極徠忠精貫日月聲名震陪儔君王市

駿骨得此七尺駉秣以天山禾貯之黃金臺玉勒繡羅
鞍映帶文錦敕謂言開道路亦復薄蓬萊乞歸丞相府
連月書百回東郊治公姓笑渡濤江雷奉身信美矣體
國安在哉帝家十二閑何嘗列駑駘遲子復立仗來歸
勿徘徊

送聞人茂德

滋

刪定歸嘉禾

辛巳八月七日

七年束帶趁朝參共喜儒林得指南經傳注成頭未白
公卿閱徧綬猶藍秋來去國懷張翰此去論詩憶鄭覃

別酒易闌情不盡會憑清夢聽清談

去秋芮國器以詩賀入館今渠繼來次韻

辛巳八月

一自傳刀夢遲君已隔秋浪傳迷弱水未省礙虛舟

闕

天子方神武單于敢寇讎應須

漢充國早晚與兵謀

芮答屯田策刀
夢去歲自言

陸務觀病彌旬僕不知也佳篇謝隣里次韻自

解

辛巳

閉戶十日雨陸居如坐舫吾身固已困未省子疾狀昨

朝拜床前不敏祇自愴蕭然維摩几高謝桓榮帳是身
本何有更慮不已恙全人豆肩大瘳癭誰甕瓷擲杯蛇
自去靜耳蟻為諒乃知閱肘後未免信紙上大哉橫氣
機寄此語清壯我雖問疾晚可以無恨悵

次韻芮國器正字館中木樨三首

辛巳

有生定自為黃卷一念無如魚蠹何今度全身散金粟
芸香從此不須多

曉翻汗簡困遮羅午對枯枰輒爛柯天遣幽香一喚起

醒然頓作出瓶鶩

怪底花開已兩回先生倬直未銜杯若猶不領渠儂意
猶向堦前一再開

慧海大師日智索詩

辛巳九月十九日

人人飽食即安眠慙愧師營粥後緣三蔑繞身猶未解
齋厨已報爨無烟

徑山說法口瀾翻慧海精勤三十年他日宣城傳僧寶
莫分禪律一時編

湯孺人挽詞

處州丞相之
女 辛巳

歎息閨房秀霜摧髮未華女工丞相念婦道里人嗟石
窮脂田廢濤江粉旒斜西風看花淚寂寞小窓紗

年家太夫人鄭氏挽詞

趙伯椿之
母 辛巳

早適王孫貴中成令子名齊眉餘婦順截髮助交情三
金應天相重泉賴日傾升堂今已矣淚洒越溪橫

王季海正言父宣義

師德

挽詞

辛巳
冬

三世儒科獨隱淪功名豈必在吾身早看伯氏囊荷舊

晚喜郎君諫草新絳縣人存疑甲子論衡書就困庚辛
遙知會葬車千兩絮酒淋漓臥冢麟

送司農少卿杜起華出守遂寧

壬午正月乙亥

識公七年前青衫騎破羈送公七年後金章大州守窮
達反掌耳置之勿復論憶公出蜀日避名如避喧神羊
一在首慷慨眉宇軒朝陳擊奸疏暮進興邦言炎炎中
郎將解帶西南奔矯矯內押班掛冠神武門所以杜御
史姓名滿乾坤人生有聚散安所非游宦徵黃不作難

聖主方味諫

次韻張真父著作遊湖山

壬午二月

今休黃閣訟

關

念長安遠出遊寫我憂駕言豈顧返撐

舟度平湖蠟屐試疊巘境幽客更佳風靜日亦烜爾僕
毋告勞我足尚忘蹇眼明見孤山地禁接上苑却登靈
隱寺巖壑此其本經行盡精舍一一為排鏈勝游固可
繼况乃春未晚所嗟蟣蝨臣無術助龍衮頗聞議深討
將士不及飯古稱格苗頑不必侵自阮吾民戰吾地甌

脫未少損願言休王師歲熟禾自秬

次韻真父著庭緗梅

壬午二月

繭黃織就費天機付與園林晚出枝東觀竒童承詔後
南昌故尉欲仙時芳心向日重重展清馥因風細細知
詩老品題猶誤在紅梅未是獨開遲

送馮圓仲吏部出守邛州

壬午二月

戰伐驚前日安危決此時諸侯今有望萬里子何之市
駿甘求骨呼鷹若待饑寸心懸日月不為去來移

鉅末藏銛利刀頭愜寢興為郎非白首補郡有奇能交

分看前輩離愁愧老僧亭亭望中塔高處待重登

同舍

餞飲湖寺登寶塔
未盡悵然而別

送湯相守紹興二十韻

壬午
二月

漢闢蕭居守周興畢保釐安危元注想中外自隨時憶
昨生戎馬誰知死佛狸天其永我命王乃大巡師收拾
鑪錘手經綸管籥司南圖忘震蕩北上得逶迤銅刻新
符獸金塗舊印龜從容時屬耳填撫効如斯帝意仍調

鼎親榮寧

去聲

擁麾班衣加畫繡通帛雜牙旗餘力今循

霸洪鈞昔相夔斯民先已覺此地更何為玉帛塗山會
銀黃越將垂圖經千古事賓幕幾人詩有客叨恩顧無
才負已知身留蓬島直夢度浙江湄投効難何有登庸
恐不遲行逢三月楔看即百錢齎祖餞紛離席班迎指
後期一夫非自喜正為太平基

次韻鄒德章

標

監簿官舍芙蓉芭蕉

士干

君不見蜀都之城百里長無數芙蓉遮女牆遂令邦人

記舊俗往往空巷爭新妝又不見雲夢澤中吞美惡相
如所夸殊落落獨將已且並蘭芷楚客至今猶憶昨兩
邦不為天下溪顧乃着意濁水泥眼看紅綠意先眩玩
物固應為物迷豈知弱質甚蒲柳成毀須臾翻覆手春
風秋露畧紛敷皓雪青霜已摧朽主人學道窮三餘俯
視官舍真蘧廬從渠草木榮與枯只有此心常自如水
邊比色寧見素隍中覆鹿初何據似耶非耶誰與論彼
夢我夢隨所住大篇字字皆披沙清晨走送驚隣家鈍

根也復發深省世間何物非空花

奉常林黃中博士以黃柑食陸務觀司直陸賦

長句林邀予次韻

壬午

林子勇報國太華欲力擘吾嘗歎其材浮海中巨舶向
來固不用今用猶迫迤比興柑纍纍霜飽實未摘不使
供王羞何異棄道側山東一百郡風氣久恨隅子如又
思歸殊勲定誰冊考哉狄梁公竚立望雲白親舍豈不
念王事正求索前聞獻果餘

用叔孫
通事

手餉懷橘客雖非

木奴千殆過庭實百兩公相親意初不主穀核當于古
人求未可度以臆如我乃無用甘作下惠阨

許陸務觀館中海棠未與而詩來次韻

莫嗔芳意太矜持曾得三郎簪策吹

事見梅聖俞詩注

今日若

無工部句慙慙猶惜最殘枝

以紅碧二色桃花送務觀

壬午二月

碧雲欲合帶紅霞知是秦人洞裏花俗眼只應窺燕麥
不如送與謫仙家

范致能以詩求二色桃再次韻二首

霓裳舞罷醉流霞
翠袖頻揜眼欲花
丈室蕭然那用此
春深料得客思家

翰墨場中蔡少霞
如今悟徹頌桃花
看朱成碧吾方眩
試把橫枝問作家

劉信叔

錡

太尉挽詞二首

壬午

今代詩書帥收功
百戰餘人誰不開
府公獨帶除書死
後家無甌生前客
有車輕財并待士
此意古何如

不謂擒胡月妖星犯將營

去冬星犯上將

伊吾空有志渭上不成

耕衆議磨圭玷他年聽鼓聲何妨築高冢為象順昌城

務觀得曾吉甫茶及以詩見遺因次其韻

壬午

詩仙餉子北苑雪正欲一洗東華塵道山廷尉俱夢事

喚醒野軒真主人

送洪景廬舍人北使

壬午四月

嘗記揮毫草檄初必知鳴鏑集單于由來筆下三千牘
可勝軍中十萬夫已許乞盟朝渭上不妨持節過幽都

吾君甚似仁皇帝宜有韓公贊廟謨

次韻務觀迎駕

壬午

法駕朝西內諸臣許後陪蹕煩民更喜鳶載路無埃我
輩猶簪筆君才合面槐如何車九九獨不與偕來

次子中兄韻三首

壬午

獻納深慙杜少陵驟紆皇眷秩頻增羽書日日驚飛電

給札歸來欲飲冰

近賜筆札令羣
臣條陳時事

讀罷新詩暖似春手搖食指舌生津平生口腹何曾計

自笑如今枉累人

黃雀不至
故有此句

黃道初開日月新
容光應不間孤臣
左螭立近焚香案
右掖名參視草人
三聖深恩空次骨
幾年歸夢已通神
阿兄念我勤招憶
好為丹爐養汞銀

陸務觀編修以石芥送劉韶美禮部劉飲以勁
酒二公皆舊隣也因其有詩次韻二首

壬午

芥辛酒苦却多情
田舍翁成嫵媚名
屋角風號天欲雪
胸中浩浩正春生

自移家具失連牆不復燈前共詠觴
手裡有詩憐指動甕邊無分笑頭方

招陸務觀食江南笋歸有絕句云色如玉版猫

頭筍味抵駝峯牛尾狸歸向妻孥誇至夕書

生寒乞定難醫戲和

壬午

東厨日日厭侯鯖却羨萍蘂擣韭根如我乃真寒乞耳
只知肉味筍殊村

次韻程泰之駕部送猴

壬午

團團擾擾使生憎誰暇徐觀棘刺能駕部猶嫌無駿馬
他人須用土牛乘

寄題新居羅長卿觀瀾閣蘭臺二首

壬午

大江來章貢小江出香城快哉一閣上挹此二水清江
落波瀾靜江漲波瀾驚四時五變化兩目常兼并登臨
苟得要坐使萬象呈吾聞鄒國軻耻作么麼生平生浩
然氣直與天地盈觀水必觀瀾寓言見真情雨集溝澮
間肯把青眼橫長卿軻之徒胸中氣崢嶸學障百川東

詞如三峽傾此道素自得此景宜天成我本烟波徒臨
流嘗濯纓他年理漁艇往尋鷗鷺盟倘繪新居圖載我

一葉輕

君不見漢家築臺臨咸京圖籍排比如魚鱗又不見晉
人創亭稽山陰羣賢畢集羅簪紳古今名蘭固多矣而
此二者常不泯乃知草木本無取必假人物始可珍夫
君名高斗以南築臺宛在江之濱楚人盈要競服艾羌
獨滋蘭真絕倫風搖綠葉劒戟舞雨折香芭檀麝新不

寧充幃悅鼻觀正自紉佩持吾身堂奧藏書三萬軸盡
校魚魯分根銀堂中延客三千履可結僑札參雷陳定
知斯堂閱千載與昔臺亭名共振僕也生憎鮑魚肆扣
門屢作君家賓小槽珠滴不待滿有時旋漉頭上巾醉
留惡語浣君壁有客如此君勿嗔

讀史二首

壬午

舜作九成樂丹鳳儀其宮周備既醉福高岡始鳴桐區
區漢宣帝雜霸欺羣聾憚誅廣漢族一變高文風德教

既不仕覽輝理未通惟昔周道衰麟出大野中尼父絕
史筆蓋傷吾道窮漢治非虞周鳳來與麟同胡然潁川
守乃敢貪天功下義上賞姦甚哉其相蒙

洪喬晉名士恥為致書郵扁舟石頭路百函委湍流惠
固有不費俛從諒何尤性也倘自異却之尚為優奈何
負諾責而令任沉浮天報在爾子晚解桓溫仇荅謝豈
不審何至空函投坐此竟棄絕佗僚歸山丘乃知網恢
恢小惡靡不酬寄語輕薄子勿貽子孫憂

漁父四時歌

壬午

三湘七澤雲連水短棹意行無遠邇江花時傍綠簑飛
水鳥忽從清唱起醉後懽呼踏浪兒鮪可鱸兮杭可炊
芳草從教天樣遠都無閒恨可萋迷碧桃幾片來何處
試訪秦人武陵路

朝霞沉綺鳥鵲興釣車徐理棖一鳴夕蟾散金鷗鷺浴
乘流蕩漿清江曲行人卓午汗如流綠陰濃處找扁舟
絲綸卷盡身無事日長睡足風颼颼覺來一觴仍起舞

未信人間有炎暑

世人只詠江如練此景何曾眼中見露零月白人已眠
萬頃風光儂自占萬鱸況復生計優酒醒還醉餘何求
有時閒看飛鴻字斜倚篙竿不掉頭曉來誰誤招招渡
一笑黃緣葦間去

白浪粘天雲覆地津人斷渡征人喟欲矜好手傲風波
故把扁舟恣遊戲雪簑不博狐白裘尺寸之膚暖即休
賣魚得錢沽美酒翁媪兒孫交勸酬田家禾熟疲輸送

樂哉蓬底華胥夢

文忠集卷二

欽定四庫全書

文忠集卷三

省齋文彙三

宋 周必大 撰

古律詩四十六首

起隆興癸未止乾道乙酉
臨安 廬陵

四禽

癸未時孝宗元年

人言百舌巧暑至輒無聲不如鳩雖拙四時知陰晴提
壺勸我飲我醉誰解醒布穀獨可聽要當早歸耕

恩許奉祠子中兄重寄臣字韻詩再次韻

癸未

迂儒豈足助維新日奉威顏謝主臣可罷本非緣一事
致疑初不怨三人弟兄有祿供溫飽畎畝何階荅聖神
此去讀書真事業向來正字誤根銀

次韻子中兄相迎詩中有奠松楸之語追念別

後叔母子柔下世故卒章及之

癸未

浙水秦淮度十霜官清誰薄簡編香春來恠底鳥鳥樂
歸去喜同燈燭光身近廣寒猶內熱手遮赫日却心涼
只愁初踏江邊路封土累然似斧堂

某求去之日乾鵲
噪簷劉賓之正在

坐戲曰遷乎某
曰遂志耳果然

次韻陸務觀送行二首

癸未

蓬閣虛生白蘭臺汗殺青英遊迷歲月神武動風霆遷
擢恩頻忝黥黎困未醒空希范蠡去羞對浙江亭

議論今誰及詞章更可宗三年依玉樹一別送塵容盡
日尋山寺思君傍塞烽

務觀將
赴京口

五言何敢續持用當緘

封

張淵道侍郎挽詞二首

癸未

籍甚中興日歸欣載戢秋周旋黃石法邂逅赤松遊
名與衡山峙身隨楚水流若為窺智勇家世本留侯

南國頻移鎮西清屢進班衮衣元纒繆貝錦謾爛斑斜

日逢單闕

公薨以
乙卯夏

流金識大還惟餘千字誄傳誦滿人

間

重九竹園見梨花懷子中兄

癸未

春花着雨即塵埃何似深秋耐久開菊尚無多饒瑞質
霜如有意護香顚也知林下風光早不為山中歷日催

望斷行人思折寄却疑呼作嶺頭梅

九月十八日夜忽夢作送王龜齡詩兩句枕上

足成之

匈奴何敢渡江東一士真過萬馬雄
唐室安危誰可佩
雪山輕重屬之公
天臺不納尚書履
鄉縣猶行御史驄
行樂休嫌園小小
高歌幸有鼻隆隆

龜齡家有小小園而侍姬號隆隆

寄題龍泉孫大同司戶三桂堂

癸未

山居速化植千荻
孫家種木惟種德
一朝仙籍浮桂香

昔笑其迂今改色鄰翁答兒乞條枚條枚不惜莫浪栽
君不見天街十二綠槐滿獨有城東之槐應三台

題神岡廟其神蓋六朝時劉竺使君也

癸未
十月

岸斷川平拔一峯丹青剝落古靈宮邦人歲久忘遺愛
賈客時來乞好風二水有情猶罄折霜楓無數尚旗紅
岡頭故址宜亭榭城郭江山盡眼中

去年會慶節初定上壽儀勅差翰林承旨今樞
密洪景嚴攝殿中監執酒盞予攝少監以酒

注予蓋既而準故事權停此禮但拜表文德

殿下從駕朝德宮今年赴永和寺觀罷散武

弁三數人而已有感成小詩

癸未

去歲茲辰侍赤墀詔黃親許奉瑤卮如今不及封人賤
猶對君王効祝辭

再次去年子中兄送黃雀不至韻

祝壽筵開正小春兄酬弟勸喜津津披綿走送非無意
小愧乘成多忘人

送芮國器察院漕廣東

甲申正月

星聚曾尊德箕張各避風別離雙鬢異邂逅一尊同五
嶺皇華使扁舟漁釣翁江分鴻不到書札若為通

龍湏道中

甲申二月

客勞

一作問

田頭餉渠憐馬上郎作勞并罄控未用別閒

忙

同子中兄遊龍湏吉祥善生諸寺歸至柞樹渡

大風雨中登舟

甲申二月

徧尋山寺穿雲子歸戲風波踏浪兒事業如斯官給廩

廬陵米貴有人飢

今春不雨
民多艱食

甲申中秋子中兄賦詩有人月分圓二十年之

句蓋歎中間多難且離別未嘗為會也次韻

世事渾如蝸過前刀頭喜對鏡飛天陰晴萬里同茲夕

離別前時照幾年此去莫令疎會合從來無意必騰騫

幾思種秫迎佳節窮鬼還來笑買田

近屢為此計
垂成輒破

夜坐困甚

甲申

馬通薪熟夜爐深拄膝承顏夢欲成不記坐來湯沸鼎
却疑蓬底聽灘聲

乘成臺觀雪憶子上兄

甲申十一月
二十七日

南雪霏微積便晞兒童只慣管中窺誰知今歲望不斷
天與一臺成此奇苔護履痕韁疊疊松垂談麈玉枝枝
團團忽憶新令尹天際帆飛歸不疑

次韻王

洋

少府送蕉坑茶

甲申

昏然午枕困漳濱醒後清風賴子真初似參禪逢硬語

久如味諫得端人王程不趁清明宴野老先分浩蕩春
敢向柘羅評綠玉待君同碾試飛塵

同年劉辰告妻易氏挽詞

甲申十
二月

曾師班女頌兄功何意安仁悼德宮園解鵲原芳譽遠
塵昏鸞鏡玉容空蕭騷風棘悲諸子寂寞笙歌泣舞童
莫訝無從出哀涕良人契合四般同

二月十七夜與諸弟小酌嘗榘實誤食烏喙烏

喙董也古書云以董寘酒殺人戲成小詩

乙酉

伏神老芋不傷生江蠚螫禍不輕我獨好奇嘗酒董
誤思樞實殺三彭

題聳寒圖二絕 乙酉

浪傳魁梧越滄溟過譽清夷得好銘今見畫圖寒乞甚
心聲心畫果難形

道山仙聖典刑真原廟功臣劔佩新歸掩柴門無此夢
撚鬚畫腹對斯人

二月二十六日携家游青原歸入陽園酴醾盛

開誦子中兄擣雲搖碧露繁星之句賦此詩

乙酉

偶從山寺賞春還問訊名花已破慳清絕比梅加馥郁
丰容似菊更妖嫵碧雲重憶尊前句紅纈遙思醉後顏
寒食清明祇旬日綠齋芍藥待君攀

故翰林汪公明端居零陵時嘗作玩鷗亭今疆

中提幹敬以其榜揭荆溪第中命某賦詩

乙酉

賈生問鵬謾傷神應愧先生入理深肝膽何曾分楚越

心形直欲混人禽亭郵永鎮愚溪上扁榜重門卷畫陰
見說騎鯨游汗漫倘憑鷗鳥一傳音

永新賀升卿携中原六圖相過其論古名將出

師道路形勢可指諸掌為賦此詩

乙酉四月十九日

歷歷山河一卷書博聞疑是古潛夫金城未入職方貢

玉座正披輿地圖取虢不應須假道勝齊終恐用真儒

從來美玉勞三獻望比巾箱襲硃砂

君嘗再上書

次韻芮漕國器憶去年上元二首

乙酉

使節番禺重中朝社稷臣喜沉刁斗夜遠布玉墀春古

寺看紅葉

報恩寺菩提
葉燈最佳

蕃街試幻人餘歡曾盡否應記

繞梁塵

門外人隨月牕前竹動風老便佳節靜病幸綠樽空春
至鴻聲北人遙蝶夢東隔年詩有債生理固知窮

次韻廣東芮漕時聞其部中寇退而湖湘之民

方避地來此

乙酉
五月

笑酌貪泉為賦詩凜然清節照南夷廐空不納如羊馬

才大常嗤捕鼠狸盜已奔秦非地險心遲去魯只天知
愛君勤把歸鞭促莫待鸞旗訪具茨

病廢壺觴懶廢詩漸參禪悅學希夷志非鴻鵠寧憎燕
路怯豺狼更畏狸節物匆匆愁裡度人情擾擾靜中知
已營二頃親簞笠何日三間看墜茨

胡季懷有詩約羣從為秋泉之集輒以山果助

筵戲作二疊

乙酉六月九日

近詩通譜江西社新釀纔先天下秋已許眼中窺一豹

可容杯裏散千憂

君家香醪蜜不如試投木桃望瑤琚敢誇所無易所有
潘郎一出果盈車

病中次務觀通判韻

乙酉九月十六日

老眼亂蟬翼樂事歡何有經年不銜杯更暇問濡首愛
山空在山槲埴詎容走塵埃登高帽生澁彈棋手三年
一蒲團近者坐欲朽朝來獨何事乾鵲窺甕牖開門得
新詩刮膜如釋負卷舒幾百回呼舞駭隣友吾曹交以

淡悠久或采韭此味只自知他人薄玄酒

次折仲古樞密韻寄題萊陽曹欽臣彥若藏書

室

乙酉十月八日

讀書清淨業病亦與心違簡蠹蟬穿字帙藏蛛織衣羨
君傳七畧何日款重闈不憚浮湘去其如失步歸

訪胡邦衡庭前四菊茂甚因賦二絕

乙酉十月

大杓親分兩玉瓶東籬手植萬金英荒園有酒愁無菊
擬乞繁華助眼明

揮毫曾對沈郎花好事今同元亮家看即槐庭滿桃李

霜枝留與野人誇

今兩省紫薇花沈德和初植前句常及之

往蒙丘宗元紹知縣以佳句為壽今承解印次

韻贈別

乙酉十月十五日

百里人人卧去輪兒從父老季從昆飛鳧空戀古仙伯
展驥難留龐士元蟾桂影圓人欲別驪駒歌闋客無言
太微已動哀顏色應待循良歎相垣

十月十七日大椿堂小集胡從周季懷以予目

疾皆許送白酒彌旬不至戲成長韻

乙酉

畏疾甚畏威目昏口止酒爾來時一中免使論薄厚儀

康業廢杞釀具散莫糾採藥山已焚

白酒以野草為藥

種秫時

轉後門稀問字客室乏借書缶尚賴金石交每願貧病

史前時相娛樂如對疏廣受有漿不待乞似驗歲在酉

今日掃風軒明日芼園菽白衣兩不來徃徃化烏有頗

聞繼高會霑醉牛馬走寧忘伐木詩酤滑吞朋友或疑

決西江恥復餉升斗胡不玩易象樽簋納吾牖二義倘

未然諾責何為負君兮優阮籍僕也減充守結交十五
年果可不飲否食言能無肥有孚乃免咎速宜倒糟牀
走送昔與醜勿學比舍郎夜半招吏部

守部
協音

送七兄監廟赴南宮兼呈大兄知縣二首

乙酉
十二

月四
日

俊兄才學衆人知富貴功名自有時海運今看鵬怒擊

韶成始是鳳來儀狀頭謾說文階峻榜眼常多紫綬垂

太上朝連十榜進士第
二人所歷官皆過大魁家有鄭公遺笏在一聞吉語即

相貽

上世有楷笏遺訓傳登科者今某守之兵火以來故物惟此耳

河梁曾誦送行篇蝸角牛毛十五年

庚午冬某赴省兄詩云爾

畢竟

中間皆夢耳祇今相對合蒼然蕭蕭暫隔連床雨蕩蕩初行萬斛舡誰近上林看躍馬東陽詩句定先傳

曾英發運幹頃携二詩相過今復寄贈大篇且

惠漢唐金石刻輒次前韻道謝

乙酉十二月八日

君家奕葉播芳馨室有圖書暴兩榮詩什編成風雅頌寶章臨徧草真行興來文陣千軍掃醉後談鋒一座傾

已許春風來過我從今日日聽嚴程

屢空不擬論錢神多病惟思對藥臣驟獲斷碑勝與綯
徐觀妙語可書紳起予字字興三歎集古駸駸訪九垓
欲寄佳州選何物折楊聊復和韶鈞

贈孫次山

乙酉

南澗有奇松歲晚鬱青蒼北隴有寒梅同傲雪與霜實
大華更榮二美乃相望我從採樵歸聞此百步香不辭
踐荒穢所欣識孤芳可玩不可折折枝亦何傷但恐入

市門羞薄時世妝少須子含酸且復成其章味宜調鼎
食材可中虹梁知音不難逢會當貢明光

十二月二十二日葛守送羊羔酒戲占小詩

乙酉

馬乳三年隔大官羊羔今日倒芳樽淺斟低唱非吾事
醉夢惟應踏菜園

胡邦衡送酒有酒婢之語次韻

乙酉

侍郎情所寄九醞屈楊枝釀熟仍親酌方成一段奇

文忠集卷三

欽定四庫全書

集部

文忠集卷四

五

詳校官庶吉士_臣李傳熊

主事_臣呂雲棟覆勘

總校官進士_臣楊懋珩

校對官學正_臣李巖

謄錄監生_臣于時和

欽定四庫全書

文忠集卷四

省齋文藁四

宋 周必大 撰

古律詩八十五首

起乾道丙戌止己丑
廬陵抵宜興江行

青衣道人羅尚簡論予命宜退不宜進甚契鄙

心連日求詩為賦一首

丙戌
正月

亦知磨蝎直身宮懶訪星官與歷翁豈有虛名望蘇子
謾令簸惡似韓公時清早退人誰肯命薄當閒我自通

破戒問君君會否幾人于此不相蒙

退之云我生之辰月宿南斗東坡嘗

論此僕之星辰偶同

次韻胡邦衡二首

丙戌二月十三日

馮翊當年助匪頒殊方此日奉賓歡淺斟想對銷金帳

生意重尋

一作羞看

白玉槃蟻泛似緣羶足慕海凝如得毳

逃寒十年百榼何須辨試問東風可味酸

右春日飲羊羔酒

姚魏紛紛殆百家天香一出自無譁傷多莫厭扶頭酒

貴少翻嫌滿眼花康樂舊聞宜水竹翰林新調帶烟霞

李白云他人之文如山無烟霞而其清平調正為牡丹作從渠草木呈新巧終愧吾

公正且葩

右二月十二日牡丹一花先開

再賦羊羔酒

丙戌二月

日日茅柴帚愁羶葷暫逐富兒游山中萬足天美祿賸作酒材供拍浮

二月十五日同兄弟甥姪遊西臺次子載弟韻

丙戌

地飲成真率天風怒溢慙臺臨平野迴人對老僧閒已

是尋春至仍容載月還郊垌有如此能不數追攀

項創棊色之論邦衡深然之明日府中花會戲

成二絕

丙戌二月十六日

局勢方迷棊有色歌聲不發酒無歡明朝一彩定三賽

國手秋唇雙牡丹

謂新妓李瑩李棠也

醉紅政不妨文飲呼白從來要助歡棊色應同三昧色
牡丹何似九秋丹

二月十七日葛守錢倅出所和胡邦衡羊羔酒

詩再次韻簡二公

丙戌

德似羊羔春共頌
政如醇酎野多歡
屬厭靖節杯中物
屢費將軍行裏槃
疇昔調飢惟飲濕
祇今軟飽不言寒
唱酬妍麗歸公等
自笑梅翁語帶酸

次韻江州林黃中上巳日會邛州劉侍郎梓漕

任直閣于庾樓

丙戌

牙旗排檻曉鳴風
樓上何人清宴同
東道主開軍府盛
西都賓共聖賢中
詞鋒永日論堅白
輦路他年記軟紅

頗念平生故人否羽觴寂寞坐談空

五月南山蛟壞民田百畝胡英彥有詩次韻

丙戌

旌陽昔屠蛟勲塞天宇大涵淹此遺種千歲不悔過良
苗蔚懷新脩作渺茫墮懦夫愧鼻祖無策祇愁卧勇哉
韓退之切齒鯨為禍雄詞坐以逐豈必勞刮剝有如衛
承光經物誰能浣清泉復化土魚鼈枯可剉從今仕執

珪

依飛以斬蛟仕執珪

先已最郡課

胡長彥母解氏挽詞

丙戌
六月

護死蘭枯及老堂翩翩丹旆逐風翔水間鱗躍悲餘閣
紙上鸞迴閤古囊年過九齡今代少家留一桂異時芳
衰宗自恨通姻晚不及陶家饌客觴

橫州太守趙持挽詩

丙戌

憶驅千騎過田間充國年耆髯未斑遺事劇談黃閣老
君少家穎昌能道蘇黃門事舊游追記玉門關橫槎只道南通海妖
夢那知夜裂山宿將如今幾人在稍聽鼙鼓涕先潛

次韻湯朝美古意二首

丁亥閏七月

來賓有雙鴈哦哦漸江皋豈嘗謀稻梁逝將辨卑高乃
知可為儀初不在羽毛鄙哉負塗豕踣躅爭一槽雲間
兩鳴鶴清聲聞去聲蘭皋洗我鼃黽耳興逐秋天高頗欲
從之游安得六翮毛歸來三歎息誰家鬧檀槽

游茅山道中望岡阜西南來勢若連環既赴三

茅而尾北擲馬上口占

丁亥九月二日

千峯溧陽來勢若西南奔遙拱三茅峯不敢迫致尊

近三

茅無山

三茅如軒懸次序儼弟昆正西闢夷塗群西之所

門至今下泊宮往往彌旗旛

戲示凝神庵張椿齡

丁亥九月四日椿齡時傷足不能行

仙師足厭踏京洛亦復懶控茅峯鶴遺形聊示德充符

閉目定從陳鉄脚

事見山記未自英傳

次韻溧水令李彥平清賞圖

丁亥

俗吏才拘拘書生志落落均之窘几案底處着丘壑中
山李長官整暇非政學庭虛吏散早園古門頻啄問之
何能耳行道輕去就誰如班孟堅齷齪事元舅紛紛名

利場風俗日益蠱腰圍黃金帶巧宦不難取惟有佳兒
孫未易以力致君看房杜輦勲業照文字徐勣尚笑之
垂誠甚切至何如遺清白世有賢者類詩書聞過庭杖
屨奉安步邑人爭指似玉立稱祖父豈惟慰眼前門戶
賴不仆翁乎復何憂弦歌樂朝暮

蕪湖宰沈約之端節惠詩編次韻為謝

丁亥九月二十

日

今君到處即文場未怕簿書期會忙神術有時朝賜履

賡歌無路贅垂裳
彭州篇什元飛動
工部交游更老蒼
自古詩人貴磨琢
試看淇澳詠文章

池陽四詠

丁亥

夜泊清溪弄水亭
棹謳徐起月華明
水晶宮畔西湖上
除却兩邦無此清

右弄水亭

天遣江山助牧之
詩材猶及杜筠兒
向來稍喜唐風集

今信樊川是父師

右杜荀鶴長林

君葺城樓望九峯
我能徧踏九芙蓉
飛雲捲雨輸賢守

透月穿天乞老農

右九華樓

地占齊山最上頭，州城宛在水中洲。
蜿蜒正作長虹墮，

吸住江河萬里流。

右翠微亭

再登翠微亭和同年湯平甫知縣二首

丁亥九月二十

三

上清別殿舊通明，仙聖飛騰戶不扃。
出郭尚疑窓列岫，

絕堤始露嶽真形。

堤盡猶水而觀石，
骨層出山形在此。

奇奇怪怪無非洞，

下下高高總可亭。但把醺酣酬絕景，
天風吹面徑須醒。

相君早日翼天飛晚落江湖罪以微好事一時開翠壁

佳名千古記黃扉

王哲山記云或謂因唐刺史齊映得名予觀映傳及池州題名映未嘗為

刺史而裴度所作壁記但有倉部郎中齊君又在元和四年非映甚明而映罷相後當歷江西觀察使池舊隸江西則此山以映得名不為無據特不當言刺史耳朝游要及鴉翻樹夕返何妨

螢濕衣更得湯休奇絕句後來誰憶謝元暉

登九華山化城峯

丁亥九月二十九日

攀蘿度險捷猱猿石角鉤衣屨盡穿莫訝遠尋金地藏
也曾徐步玉堦前

登龜山

同前

注坡緣壁化城中客慍奴嗔我亦慵及至龜山還一上
為憐高閣對雙峯

贈崇壽寺僧善修

同前

老僧九十視耽耽二十年來不下山我得九華充法供
亦能禁足老山間

游雲光寺李提舉

庚

領客將至留二小詩

來如負弩先去為乘驄避江頭一片石留伴幽人醉

作者正七人

主賓
七人

飲中空八仙長齋詎容醉晉也合逃禪

泛清溪至玉鏡潭

丁亥十月一日

清溪水色勝如藍
祖石移舟下鏡潭
妙絕畫屏并碧玉
謫仙不見與誰談

望皖公山

丁亥十月十三日

太婆嶺獨高秋
浦皖公山正望
龍舒端如牛女
隔天漢不似彭郎近小姑

遊廬山佛手巖雪霽望南山

丁亥十月二十三日

十日頑陰不見山
山中一夜雪封菴
伊予的有尋山分
日照北山雲在南

遊廬山弔大林

上盡諸峯地轉平
天低雲近日多陰
古來南北通雙徑
此去東南啟二林
虞世南碑從泯沒
白居易序合推尋
匡廬第一真僊境
忍使如今遂陸沉

天池觀文殊燈

滿目風塵暗五臺
南方世界且徘徊
一燈別是真知識

不用奔波學善財

贈栖賢藏主可昇

眉州人與予同庚
丁亥十月二十六日

我比同年百不能只餘霜鬢愧師兄
慇懃覓句無言說
共撥寒灰聽水聲

游廬山舟中賦四韻

丁亥十月二十八日

南北同廬阜東西徧九華
宴安無酖毒痼疾有烟霞
淡薄村酒甘香院院茶
馳驅君莫厭此出勝居家

陳宰有詩來迎次韻

丁亥十一月十九日

沿沂江湖樂有餘
惱惱何必歎東徂
賞心到處窮佳境
好事逢人得異書
風浪送颿時一快
魚龍潛穴不須驅
歸來正使無泥洗
合厭香醪作歲除

是行徧歷三茅九華匡廬西山又獲

書籍碑刻頗富

七兄以詩相迎次韻

丁亥十二月三日

昔作忽忽去今成緩緩歸
江山若招隱鷗鷺信忘機
已分漁舟老還思鴈序飛
天公知客意帆飽水生肥

走筆次七兄韻戲奉新新莊

丁亥十二月五日

臘月更兼逢臘日滿江飛雪兆豐年從兄預借南昌米
多釀新醪醉樂天

次韻胡邦衡相迎

丁亥十二月

路逢驛使嶺頭回喜得新詩勝得梅情似春風綠綠柳
句如臘雪肩韓瑰祗今皇側求賢席底事公銜樂聖杯
台路六符行復煥丹心一寸未應灰

向以書戲邦衡云某自廬山游西山當就迎公

召節今邦衡有詩督此語不驗次韻

丁亥十二月三

日

慧遠遙同社洪崖近拍肩松枝年紀萬
棐實歲踰千

天池

在廬山絕頂有萬年松香
城在西山絕頂有千歲棐

徑欲通天漢忙因櫂酒船

潯帥

附致厨醞四
十尊寄邦衡

香城均一握易地即皆然

邦衡新居亦
曰香城山

次韻張安國二首

并序
丁亥

連歲遠出近方拜觀安撫待制舍人送李秉將士

詩中有見及語次韻二首其一賀轉運直閣新命

其一上塵榮戟

往時渡長蘆行役甚迫東忽逢萬人傑大勝十年讀升
沉既日異歲月空電速公乎國元龜用捨興替卜如何
白玉堂倬直不滿宿共惟中興主志掃伊吾北寧容廊
廟具尚賦諸侯祿相茵朝以登胡騎夕可逐斯民補瘡
痍郡縣寬錢穀重將大手筆繼鏤泰山玉

唐封禪
燕公文

子房思亦松冠掛帶不束高風動縉紳盛事爭誦讀向
來進匪銳今退那得速皇帝六載冬熏燎郊再卜均釐
際蓋壤賚予首耆宿煌煌舊使星密映紫微北要令對

青藜聊復寓天祿人言驥雖老萬馬未易逐方為帝者
師敢請罷辟穀魯公從周公榮哉佩聯玉

致政楊圖南

扶

僉判惠園亭石刻來索惡語寄

題三首

戊子

湖山亭

七十歸休古亦稀誰瀕四十掛朝衣天如不發湖山闕
林下真無一士歸

秀野堂

一見堂名憶豫州
豈知身在楚江頭
主人久享園中樂
晚歲宜先天下憂

有竹無花山澤癯
有花無竹雪肌膚
洛陽城裏花連竹
迂叟規模定不迂

次韻楊文發承議

戊子正月

才思春江下瀨船
腹藏經史更便便
坐觀林谷升初日
吟到雲山合暮烟
憶昨傾囊携過我
知君得句總堪傳
古來虛誕相如賦
枉使劉郎意欲仙

樂順之司理用楊韻贊予去歲江行遊山之樂

再次韻

戊子正月

溯洄險過峽中船賴有名山寄靜便丘壑遂將從栗里

功名何敢夢凌烟吾賢才術今誰敵野老風流未可傳

趁取桃花日千里蓬萊方丈會群仙

君將順
流造朝

寄題太和陳氏益龜堂

戊子正月
十三日

講堂昔日飛三鱣學館如今益十龜文字之祥君勿卜

明年春榜即纍纍

次韻樂順之司理新釋花權及上元不張燈二

絕句

戊子正月

一自樂卿司樂籍天桃穠李闌誇張陰成却落他人手
始悟分廂作法涼

天閤華燈亦有情知君新不顧傾城遙憐擁被哦詩句
却遣隋珠照夜明

信國太夫人慕容氏挽詞二首

戊子八月

門地榮聽履夫家世夢松初終無一欠

見張籍詩

富貴有三

從疾愈龍宮藥恩加象服封乘鸞期忽至談笑返仙峯

夫人去秋屬疾賜藥而愈
旋啟國封今聞無病薨

早慕闕遊識曾饗截髮餐升堂乖宿約契洛罷榮觀女
史新彤管宗臣泣素冠哀榮誰可擬嘉祐富之韓

胡邦衡相過賞金鳳許詩未送邦衡復作木犀

會二花殆是的對偶成韻

戊子
八月

身閒端合醉秋光兩地名花況並芳金作鳳形如許巧
木成犀理若為香髻頭自笑辜釵色沙面誰知識帶黃

莫閉詩壇偃旗鼓天生的對欠平章

鹿鳴宴坐上次錢守韻

戊子十月七日

制舉魏科世有賢聞孫傳業中興年貢才合益諸侯地
寵錢真開刺史天有弟已容持布鼓無能仍許鬻梃鞭
太平故事西崑體指日皇都萬口傳

魯季欽少卿安序堂次朱希真韻

行藏本同塗明哲遇輒安猷畝道可樂肯思負鼎干膳
肉倘愛禮豈遽涉汶川大哉天地準笑汝士女耽丈人

三吳秀此理久已參緬懷洛京老知音賞英咸佳名表
棟宇妙語來江山至今編簡香不謂室有蘭君看為邦
問正在簞瓢間閱世從川流如愚安石磐聖門惟若人
始可語易占不見繫辭中巋然獨書顏

邦衡置酒出小鬟予以官柳名之聞邦衡近買

婢名野梅故以為對

戊子十一月

濁水難攀清路塵偶曾先後掌絲綸歸來久侍茵憑舊
至後初逢梅柳新湖水歌斜應有意

東坡詩日出米湖水散花野梅官柳

漸歌
斜

春光漏洩不無因絳帷幸許天荒破日日當為問

道人

楊昌英示性悅次韻為詩

戊子十一月

聖學榛蕪欠掃除誠齋刻意紹淵興羊岐自昔迷多徑
鷄甕從今識廣居西洛窮源談近似南宗投隙說真如
早知大道容方軌何用危塗轉棧車

再次韻送楊昌英赴麻陽宰

戊子

未結綸絲侍玉除聊紆墨綬奉安輿諸君相尚耻為令

明府何妨大所居歲美莫憂君不足日長當念民無如
玉牀箭鏃何勞寄只願章交使者車

胡季懷惠六出梅一枝仍枉絕句率然次韻勿

笑拙速

戊子

怪底雪花今歲少東君聚巧入壺春老夫只學龜藏六
未羨梢頭首面新

夜夢次陳立夫韻

戊子十二月初八日

慣伴山僧汲澗泉懶隨年少夢游仙風流輸與賢兄弟

朱閣臨風教李娟

非想所及
不可曉也

七兄夜以小詩相戲走筆和韻

戊子十二月十九日

小蠻未解嚙鶯簧鑿壁偷分富燭光不是龐公靈照女

誰人為作起予商

隨兒三
歲能謳

戊子歲除以糲代酒送邦衡邦衡有詩見戲仍

送牛尾狸次韻

先生豈比習池徒薄醞仍慙校尉厨獻糲聊將追拒叅
舖糟只欲伴屠蘇削肌知自何人手灌頂疑當釋氏酬

必許尋花兼問柳敢辭提榼更提壺

邦衡再送二首一和為甚酥二和牛尾狸

己丑正月

十

金谷烹煎豈我徒磨春爭語夜開厨六年不賜湯官餽

除日猶分刺史酥

是日錢守送酥故用東坡謝泗守故事

小惠無多真畫

餅大篇有味勝清醐遙知發幕哄堂處不見蒸鷺只鉢

壺

追跡猶應怨獵徒截肪何敢恨庖厨鱠鱸湖上休誇玉

煮豆瓶中未有酥伴食偏宜十字餅先驅正賴一卮酬

却同玉面新名字腸斷元正白獸壺

牛尾狸一名玉面狸

後兩日大雪邦衡復用前韻作窮語戲和

己丑正月

十一日

天憐寓客混緇徒十日無烟香積厨蒼雪故教授碎米
饒涎那更忍流酥梅毛齧盡寒生栗風絮吟時韻怕酬
誰似維摩坐芳緇散花別是一方壺

己丑二月七日雨中讀漢元帝紀效樂天體

昭君顏如花萬里度鷄漉古今罪畫手妍醜亂羣目誰
知漢天子袷服自列屋有如公主親尚許穹廬辱况乃
嬪嬙微未得當獯鬻奈何弄文士太息爭度曲生傳琵琶
聲死對青塚哭向令老後宮安得載簡牘一時抱微
恨千古留賸馥因嗟當時事賢佞手反覆守道蕭傳死
効忠京房戮史臣一張紙此外誰復錄有琴何人操

去聲

古今賦昭君曲雖大賢所不免

僕矯其說
無乃過乎

楊文甫主簿項惠佳篇今赴松溪次韻送別

己丑

二月

投林倦翼久知還尚客君家伯仲間入市每嫌妨杖屨

臨岐那忍問河山家聲好在金陵簿

謂揚於陵也

人物爭看

玉笋班他日銀黃夸里後不妨徐伴野夫閒

錢守青原瑞靄圖

己丑夏旱得雨有獻此圖者

青原臺成知幾春倚欄但愛江山新那知遇事發奇秘
使君着眼惟憂民魯臺當年有故事首驗雲黃期歲美

鳳翔仙伯記新亭不志游觀名雨喜紛紛烟靄何足祥
豐年上瑞不可忘江頭白粲連萬檣賸與官家實大倉

胡邦衡生日以詩送北苑八銚日注二瓶

己丑六月

三
日

賀客稱觴滿冠霞

樓名

懸知酒渴正思茶尚書八餅分閩

焙主簿雙瓶揀越芽

見梅聖俞謝宣城主簿詩

妙手合調金鼎鉉清

風穩到玉皇家明年勅賜宣臺餽莫忘幽人賦葉嘉

邦衡再和再次韻

己丑六月六日

金華絕出氣凌霞不愧君王坐賜茶

講讀罷例賜茶一甌

商嶺剪

來思舊樣

王元之詩云樣標龍鳳號題新賜得還因作近臣烹處豈期商嶺水碾時空想建溪春香

于九畹芳蘭氣圓似三秋皓月輪愛惜不嘗惟恐盡除將供養白頭親

洛泉煎處歎新芽

唐劉言史與孟郊洛北野泉煎茶詩云粉細越笋芽

詩評未怕人生癭鹽濟惟防

賊破家賸欲蒼生蘇息否剛嚴須是相王嘉

邦衡姪季懷亦惠二詩再次韻二首一頌其叔

姪之美一解季懷生日不送茶之嘲

同上

竹林終日醉流霞下客窮空抵危茶更欲打門奴酪粥

何殊斂手捧薑芽
賜金指日揮䟽傳
盛饌常時設謝家

用晉陸納撻姪事戲季懷

莫為唱酬供一笑
從今便廢爾殺嘉

蕭散玄真吏
少霞樵青日日為煎茶

謂迎恩祖

莫因閩粵臯

蘆葉却厭神仙掌上芽

闕

竹勝棊非我事

季懷八月四日

菊潭

試水是君家
不須更酌蘋洲塚
世以詩鳴句自嘉

季懷設醴且示佳篇
再賦一章以釃五詠

己丑六月

八日

卯飲高樓徹暮霞
絕勝茅屋已公茶
弱包好句逢真賞

荷葉甌深稱嫩芽詩老坐中容我輩朝賢乞處藉吾家
來詩屢引歐公茶詩故用筍包詩老事孟
郊憑周况于朝賢乞茶詩云越甌荷葉空
佳什屢酌親朋味轉嘉

尚長道見和次韻二首

己丑

詩成蜀錦粲雲霞宮樣宜嘗七寶茶壓倒柳州甘露飲
子厚茶詩猶
同甘露飲
洗空梅老白膏芽
聖俞茶詩春
芽研白膏
睡魔豈是

驚軍將茗戟都緣避作家怪底清風失炎暑朝來古甫

誦柔嘉

連日
雨涼

鍾山處士映高霞止酒惟親睡起茶
遠向溪邊尋活水閒于竹裏試陽芽
一甌休問帝前席七椀且同僧在家
所愧叔孫無五善若為重拜晉君嘉

項嘗夢至善生院賦詩一聯已丑七月十三日

因遊續成一絕

門外千竿竹繞牆清風終日注回廊
五年未續夢中夢得得來追三伏涼

七月十五日邦衡用前韻送薰衣香二貼次韻

為謝 己丑

天香猶帶曳裙霞銀合行參到闕茶

故事召用兩府將到闕中使賜銀合

茶藥及香

賸馥欲霑吾臭味普薰聊發善萌芽心清此去誇

僧舍意可由來出內家乙與博山添正氣蘄巖曾辱更

生嘉

劉向薰爐銘云嘉此正氣蘄巖若山

胡渙季享示壽詩二首十月二十五日因其生

日次韻答之 己丑

諸父聲名塞兩間主分青白轂朱丹莫年勲業心方壯

前日姦諛骨尚寒

謂邦衡

聞道秋官還簡擢

謂從周

獨憐處

士失榮觀

謂廉夫

如今喜見當家子應賦忠州此日歡

杲杲朝曦正在東
文心詩耳一時聰
學當鼎盛猶無敵
才過願期想更工
此去官游談笑裏
後來家慶畫圖中
俾昌俾艾詩人事
不似荒虛

紫竹 己丑

曾到蓬山驗異聞
浮筠翻動雪披紛
紫莖綠葉騷人句

不在秋蘭在竹君

拾遺記蓬山有浮筠之簞葉青莖紫下有砂礪細如粉暴風至竹條翻起

拂細砂
如雪霰

青紫從來豈一端要看同傲折膠寒若輕間色思方節
圓竹應須斬萬竿

武崗太守羅

渠恭

挽辭二首

己丑十一月

富貴由身致廉勤守自然常珍惟脫粟老伴只殘編天
已償高壽人猶望百年千車會葬者誰問大夫賢

憶昨登門日蟠齋擁夜爐疾姦頻齟齬悼往一喑鳴激
烈看前輩疲庸愧小儒英靈那戢木尚想握邊符

萬安韋邦彥字俊臣携王民瞻楊庭秀謝昌國

絕句相過次韻勉之

己丑十一月十日

盧溪筆力透天心楊令文追正始音更讀池塘惠連句
識君何待接清襟

後學爭歌雨後巾前賢久澤霧中文韋郎勉力追三傑
他日人還傲五雲

陳平叔相從四年文行粹然臨分惠詩有立身
行道之問敢用陽司業勉學者之意次韻為

贈已丑十
二月

好因輪斲悟觀書莫守筌蹄覓兔魚華嶽登來卑步屐
滄溟浮罷眇支渠命窮且戲娛親綵道合須牽奉詔裾
此外文章真小技未應傾慕蜀相如

贈黃格非

詩社飄零二十年春官老子復登仙

謂曾吉甫

豫章幸有橫

枝在好覓鸞膠續斷絃

文忠集卷四

欽定四庫全書

文忠集卷五

省齋文集

宋 周必大 撰

古律詩五十六首

起乾道庚寅止淳熙甲午廬陵臨安

送梁山長老智顯

庚寅

秦人溪畔漢人山萬木參天六月寒寫向湯休詩集裏

老夫要作畫圖看

丘成之司理明遠閣二首

庚寅三月四日

榜題聊復借揚雲千古行藏本自明此閣定非天祿閣
肯因寂寞便輕生

家傳秘籍慕班遊有子當追嗣與彪好事一瓊如許借

樓前百榼果為丘

君家藏書
五世矣

奉新宰楊廷秀携詩訪別次韻送之

庚寅三月
二十一日

誠齋詩名牛斗寒上規大雅非小山向來志氣薄黃散
忽為五斗輟萬卷兒童笑君非良圖大夫出處寧知渠
吳公適為南州起昔日河南今在此好賢薦士任以身

門下賈生予其人鄙夫料事倘不誤早寄重脩滕閣句

吳明可帥豫章方
修滕王閣故及之

五月三日遊簡寂食甜苦笋知觀歐陽齊年求

詩 庚寅

蔬食山間茶亦甘况逢苦笋十分甜君看齒頰留餘味
端為森森正且嚴

去夏邦衡胡侍郎生日嘗因茶詩致善頌其語
果驗再賦一篇為大用長生之祝且求賜茗

作潤筆

庚寅六月
崑山發

壽杯又是酌流霞
醉眼還醒講殿茶
舉世毗諛思舊德
隔年詩讖託新芽
漢帷果慶登三傑
邊幕何愁不一家
賜也多言如屢中
合分龍餅示旌嘉

秘閣簷摧李監仁甫得湖北漕用溫公故事作

小詩送之

庚寅
七月

臺門屋壞中丞去
秘閣簷摧少令歸
賴有溫公遺事在
故應早晚入黃扉

昨以清醇之酒為邦衡侍郎壽乃蒙惠詩且約

深秋清集至時侍郎當捨芙蓉而面三槐某

已歸醉東籬悠然見南山矣次韻為謝

庚寅七月

臨安
侍對

觚稜回首六經春重挈荷囊上要津桑下未忘三宿戀

柳邊仍喜一番新

復居舊宅然芙蓉
豈若楊柳腰支耶

即開東閣招奇士

快與湖山作主人

聞今日玉
壺盛事

濁酒誇張真過矣如公詩

句乃清醇

邦衡侍郎再惠春字韻詩次韻懷舊叙謝且致

登庸之祝

庚寅中元日

年年郡圃共尋春
夜夜神岡醉問津
公從鷄翹恩典厚
我遊麟省寵光新
願聞玉鉉調元日
幸攝金鑾草制人
致主勛華端有望
澆風于此合還醇

邦衡侍郎用舊韻慶予生朝賡續為謝

同前

蓬山落拓復經春
宦海茫茫懶問津
志節漸消平日壯
鬢毛空比去年新
午橋早並緋衣相
一月還同赤壁人

邦衡以壬午六月生某以丙午七月
生又同居廬陵故用裴度周瑜事

天遣駑駘追驥驟

無如才德異疵醇

夜直懷永和兄弟

庚寅八月
壬申

玉堂清冷夜初長風雨蕭蕭憶對牀
微道傳呼鐘鼓密
夢魂那得到君傍

重陽預約三館同舍登高于真珠園前數日李

粹伯秘丞除殿院

庚寅

勝遊元在十人中健翮先培萬里風
落帽有誰追戲馬

我冠無計屈乘驄對門尚許官曹近光館猶期燕會同
幸可誇張少年在末須細數菊花叢

與館中同僚會邦衡侍郎于南山真珠園後兩

日翰苑作開講讀會予不赴邦衡有詩見懷

次韻

庚寅九月
二十日

講席人期相鄭覃石渠我忝繼齊堪碧琳殿邃同宣召
白玉堂深接笑談寓直敢陪東道主登高尚想北山南
洞巖勝集空回首何日芒屨許再探

碧琳在禁中近因
宣召至焉洞巖廬

陵勝處去年于此賞梅來
詩有紅粟寒梢之約故云

次韻邦衡哭李懷

庚寅九月
二十二日

談鋒激烈劍芒寒
素蘊光輝珠在潭
萬里未行騏驥死
百圍將半豫章殘
山中宰相今誰繼
地下脩文古亦難
一讀名章三太息
淚流何止雍門彈

紹興庚辰九月二十三日與浙江道權帥同年
程龍圖並試玉堂庚寅歲由少蓬寓直橘文
發策試館職亦九月也有懷泰之輒寄四韻

當年給札踏金鑾重到依然九月寒

今年寒極早

學士策詢

學士策秘書官試秘書官自憐綠鬢非前度尚喜青衫
總一般寄與浙東程閣老莫矜紅旆笑儒酸

陳叔進秘書送鷄分粟為謝乃辱佳句次韻發

笑

庚寅十月十三日

有鷄不博禾三百却向枯河擲釣緝他日陳平宰天下
如瑜翻作指囷人

夜直玉堂讀王仲行正字文編用入館新詩韻

庚寅十月

二十九日

軼材騰驥駉勇思決河渠枝茂根先實名高士豈虛君
王憐舊士館殿有新除努力功名會燕然欠大書

草具屈邦衡侍郎蒙賦即事新詩次韻皆叙坐

上語他時共發一笑也

庚寅十一月十一日

舊地閑梅塢新知泥柳橋情先春色動節後歲寒凋久
矣承三接宜然冠百僚不須驚鶴髮未礙挿蟬貂

和至能范舍人農圃堂韻

庚寅

荒淫吳以顛戰勝越為吉是非兩安在阡陌眇蕭瑟公
來開別墅草莽手爬櫛陰晴及寒暑每到皆勝日新詩
弔興廢收拾滿箱帙有客師元亮甫謝彭澤秩幸分北
窓風容此易安膝

徐稚山林龍學挽詞二首

庚寅

有美傳清雅無心問介通僉言宜僕射累疏避司空

稚山

初言兵不可輕用忤王龜齡而去湯丞相疑可助已薦
為給事中累辭竟不起人始服其通介不徇時故專用
徐宣徐
身後疏中歛生前濁酒中吳鉤無路掛洒淚寄
邈事

西風

昔者陪簪筆比隣記鑿垣十年何間濶一見欲無言哭
鯉何多難葵嬴真少恩天乎如可恃門戶看諸孫

徐子禮藏宗丞挽詞

庚寅

符節何妨彩服斑專心溫清寧

去聲

求閒賓朋忽弔西河

上父子繼遊東岱間前日臺門哭瓜葛同時華屋落丘
山不須更問相從舊行道之人亦涕潛

慶邦衡生朝用去年韻

辛卯六
月三日

勁氣危言五十春
今騎厖馬踏天津
葵傾夏日心彌切
松度秋霜色轉新
鼎鼐調和知有日
君臣慶會豈因人

謂壬午與
丁未合

周流四府須三紀
壽筭休辭痛飲醇

胡廣周
流四公

三十餘年通
鑑五十七

入直召對選德殿賜茶而退

辛卯七
月四日

綠槐夾道集昏鴉
勅使傳宣坐賜茶
歸到玉堂清不寐

月鉤初上紫薇花

時兩株
盛開

陳君舉示張孝愷行狀且求詩孝愷嘗攝令華

亭有善狀

壬辰正月二十四日

簡惠唐蘓令文章漢甲科滿朝空慰藉漫仕竟蹉跎有
命窮何病無年理則那挽謳嗟不及留與邑人歌

圖經
唐蘇

齋攝華亭縣令在

官簡惠蒞事公正

過鄔子湖

壬辰五月
癸未日

萬頃湖光似鏡平
蜿蜒得得導舟行
從來仕路風波惡
却是江神不世情

奉祠還家姪繹以詩相迎次韻

壬辰
六月

聖朝有道合羞貧清畫邪容裏路珍金馬玉堂辭漢殿
桃花流水訪秦人敢吟莫莫休休句且佚膠膠擾擾身
高會竹林欣有日剩窮玉友釣溪鱗

項在道中聞邦衡侍郎將進周禮新解嘗賦詩
就為六月三日壽或謂名在丹書不當玷汙
西清之僊老羞愧而止今蒙附記生朝特貽
佳作既仍舊韻敢隱鄙言狗尾之續斐然鶴

頭之側必矣

壬辰
七月

九十談經似子春

杜子春年且九十以周禮授鄭衆等

三公虛位待平津

禮文元秉周邦舊義訓重頒楚老新鵠閣行看迎太宰

象範應記講庖人

去年公在講筵講周禮至庖人而請去

太平致了陰謀

息方信儒真道粹醇

次胡長彥司戶韻為其生日壽長彥新授桂椽

壬辰九月

二十五日

十年筆力幹千鈞齒宿于今意轉新
櫻伐廣陵聊作賦
梅開桂嶺定宜人暫從南極通冠冕
會向東方領縉紳

菊有黃花潭有水願尋漢事壽佳辰

前歲冬至與胡邦衡小語端誠殿下道直夏舊

事今年邦衡舉易緯六日七分之說輒用子

美五更三點為對數日得劉文潛運使書記

去年館中團拜十人今作八處感嘆成詩

壬辰十二月

月

青城小語慶新陽共向紅雲拜玉皇六日七分驚歲月

五更三點憶班行屬車誰從黃麾使釣艇還飛白羽觴

猶勝去年三館客十人八處耿相望

十二月十九日錢別劉文潛運使明日書來云

醉夢中作小詩但記後兩句為足成之

壬辰

幽人門巷冷如水使節光華肯再登今夕青燈話三館
明年何處說廬陵

胡邦衡賦琉璃燈簾詩次韻

癸巳正月二十八日

鷄林空詫夜明簾鰲禁曾迎金炬蓮却向江城度元夕
同看燈箔樂新年盤紅坐覺光如晝

杜陽編同昌公主夜以紅琉璃盤盛

夜光珠堂中
光明如晝

鞍白端令意欲仙

兩京雜記漢武時西毒國白光琉璃鞍在暗室

中光照十餘丈坡詩漢武憑
虛意欲仙蓋用梁武論書事
歸對短檠惟寂寞酒醒漏

永不成眠

送劉子和教授赴贛州兼簡府主洪景廬二首

癸巳閏正
月初十日

伊昔青袍地于今絳帳師家聲傳叔贛宜學類先之

李朴

先之贛人後為本州教官
久已鷄音革居然鱸服宜誰開丞相閣此

士獨非奇

藉甚書詩帥中和正爾歌人留河內寇帝念禁中頗餘
事哀丁志多聞重乙科固無官長罵解使客羶多

邦衡再送皇字韻詩來次韻

癸巳閏正月
二十二日

賓鴻列陣競隨陽却向丹山隱鳳凰銀管題詩紛滿帙
金釵度曲儼分行漢宮早促三更席梁苑行稱萬壽觴
上項諭公非晚令卿觀朕大舉同游大梁
又聞虞相陞辭今年當會于東都上壽
著處非公前祓尚誰望

又次邦衡長子

咏總幹韻 癸巳

乃公剛彥迅詞章濟美人推小贊皇君實固難安洛社
子虛亦合薦周行牛屠十九看游及鷗擊三千始濫觴
早向秦淮迎輦輅北征旗鼓正相望

李棲筠文章勁迅
有剛彥大臣之目

又次邦衡族姪長彥司戶韻

癸巳

聖世恩榮盛孝章北牕自欲傲羲皇通家燕喜鷄豚社
治郡愁親鴈鷺行陌上花開人闌草甕頭酒熟客傳觴
及時行樂君休厭召驛相將項背望

同年楊謹仲教授以詩慶予得郡次韻二首

癸巳

二 月

謬向初元從九疏坐狂朝蹟自宜收虛名誰競兩蝸角
懶性敢居千騎頭聞道宵衣勞聖主有時夜舞憶神州
二千食祿猶前却何自真封萬戶侯

才氣崢嶸早斷鰲詩豪不獨酒中豪其誰代匠頻傷斲
之子良庖却善刀莫嘆廣文官獨冷絕勝州郡職徒勞
泮宮方采僖侯藻高士休尋仲蔚蒿

邦衡侍郎作一字韻詩贈麻姑觀道士李惟賓

次韻仍效其體

癸巳五月十六日

蓋世功名陋漢黥
翩翩召掛許誰繁
氣凌霄漢哮崖鵲
文濶波瀾掣海鯨
囊水謾疑韓信怯
柵淮終畏晉兵勅
先生餘事為詩老
天宇行將一柱擎

邦衡生日用舊歲韻

光武以壬午歲起兵宣王六月北伐皆中興也邦衡

以壬午六月生故用二事
癸巳六月三日

翊戴南陽第一春
馳驅北伐太原津
天開今代風雲會
運應中興歲月新
零雨正宜蘇大旱

近日禱雨未應

清風未可

作閑人一杯安足為公壽看飲思堂萬斛醇

飲思堂春萬斛豈止

二十四考中書而已此則祝壽深意也

李秀實生日

癸巳六月四日

泰陵耆舊日衰槁白也胡為顏色好何曾山林採大藥
更說方書試鴻寶千年鼻祖翔太清至言八十授長生
坐令耳孫守家法八十髡綠雙瞳明昨日人為澹菴壽
今朝竹院笙歌奏二老風流總健強盛事他時恐難又
陛下聖德師文王作興銳欲恢封疆盡歸乎來不可緩

要看梁棟扶明堂

同年楊謹仲教授生日

癸巳六月二十八日

玉筍峯堯秀倚空清江汀渚日朝東杜蕭安在王陳遠

極貴長生總屬公

伯起宜橫講殿經若為臨賀復廬陵

嘗為臨賀教授

朝來冠雀

銜三鱣敢賀先生自此升

孝行陰功未易量從來家住玉田坊人間聊復三千歲

海上他時日更長

廣記楊雍伯有孝行傳種玉之術游海上遇羣仙後數年上昇今所居宅

號玉
田坊

載酒過門欲壽公酒杯有限壽無窮玉樽祇有天西北

不惜年年為一中

神異經西北荒有酒泉上有玉樽取一樽復一樽與天地同休飲此酒不

死

邦衡侍郎用洪範五行推薄命而成傑句歎仰

大手幾至閣筆勉賡盛意兼叙天人之應庶

知託契受辱如此其厚決非偶然耳

癸巳七月十五

日

五行陳範推箕子三壽為朋頌魯申二紀環周元附驥

某後公二紀生而

四辰鱗次豈因人

公月日時胎在未辰卯戌某日月時

同在午故用馬事

胎在申己辰亥率後一辰

交承紫掖追隨舊遞宿金鑾契分申人事

天時已如此更看坯甑累陶鈞

胡詩用東坡韻故押兩申字

艤舟清江鎮從任子嚴

詔運使求菊

癸巳九月五日

陶令思歸未得歸黃花想見遶東籬滿頭須插何容易

且向盤園乞一枝

近會同年賞芍藥嘗櫻桃楊謹仲教授有詩次

韻為謝蕙簡周孟覺知縣

甲午三月十七日

清晨自掃落花廳小甕新筍竹葉青簪盃同時過陋巷
臚傳相與記彤庭翻階紅葉曾重見僕十年間兩直西掖勅賜朱
櫻亦屢經老去飄零無此夢詩來吟咏有餘馨

用舊韻為邦衡生日壽

甲午

自公重踏秣陵春便覺威加析木津尺五去天沙路近
八千為歲壽杯新休論滄海長生藥要是清朝不死人
萬目變變觀變理紀元真欲稱熙淳

同年楊謹仲示鄉林諸帖皆以老杜相期惟童
敏德謂不合學東坡殆非知詩者輒用此意
成惡語一篇為誕辰壽祝頌之意見于末章

甲午
六月

過江人物向汪曾一世龍門未易登常恐斯文無砥柱
獨推佳句有師承波瀾正使來西蜀庶陞何妨逼少陵
天遣百年如衛武會賡懿戒頌中興

楊謹仲教授和徐師川中秋賞月詩邀余次韻

甲午八月
二十日

泥露清如洗，明河淨不流。
珠圓合浦夜，潮盛浙江秋。
盧肇

賦八月望潮最盛

朗詠陳王賦，幾成法善游。
廣寒非獨冷，莫為

客羶謀

寄題王公明樞使豫章佚老堂

甲午

君不見當年衛武髦，且期尚欲進德明。
歲規又不見潞公堂，成過九十精神折。
衝誇德威公，今年纔六十耳。
朱顏綠鬢儼未衰，便從午橋樂暇佚。
寧獨不畏二老譏，恭

惟中興聖明主焦心勞思撫四夷山東河北困戎索遠
民日夜思王師樓號籌邊宜屬意堂名佚老誰敢知請
賡方叔壯猷雅第入宣王復古詩

蕭端偉挽詞

甲午

二頃良田數畝居筆畊學殖世名儒蘭闥初喜携兒去
蒿里旋悲與婦俱四季澆花非實相百年種德是宏模
素車會葬空閭巷試問他人得爾無

靖州太守李秀實挽詞二首

甲午十二月十一日

好學今康鼎施家古計研旌麾更楚粵翰墨過幽燕晚
厭三刀夢歸開九秩年生榮沒無憾五福定誰先

伊昔觀燈夜居然飲徹明一旬聊隱几萬日遽成瑩回
首歌鐘地傷心挽鐸聲朔風知客恨猶欲返銘旌



文忠集卷五

欽定四庫全書

集部

文忠集卷六至九

詳校官庶吉士_臣李傳熊

主事_臣呂雲棟覆勘

總校官進士_臣楊懋珩

校對官學正_臣李巖

謄錄監生_臣于時和

欽定四庫全書

文忠集卷六

省齋文集六

宋 周必大 撰

古律詩五十四首

起淳熙乙未止淳熙丁酉
餘干 臨安

過餘干吳師中秀才以詩惠歛硯次韻謝之

乙未

二月
壬申

舊曾起草向明光獨與羅文近楮黃三載瓦池研竈墨

因君聊復夢儀凰

壬辰二月蒙宣召至選德用御前小
歛硯草命相制今適三年矣前輩有

羅文
君傳

恭和御制聞喜宴詩

臣以經筵官預聞喜宴恭覩聖製賜詹駉已下詩不
敢自嘿謹齋沐賡和一篇仰瀆宸嚴臣無任震懼俟

罪之至

乙未五
月十日

聖武將犁老上庭藝文先選穀中英天扶基業生多士
世遇君師集大成享備鈞臺同夏啟果分漢會愧桓榮
克言一日周天下應陋詩人切響聲

次韻賀胡邦衡除龍圖閣學士且為六月三日

眉壽之祝 乙未

馬負羲圖二百春榮光猶屬大河津細推班列論思舊

誰似耆英寵數新

今班簿中老惟公一二人

龍閣便為黃閣老洞巖

應繼紫巖人

張魏公與公至厚

他年笑爾孫思邈只自開皇至

永淳

端明殿學士王日嚴挽詞二首

乙未七月

家世三珠樹文章五鳳樓中年穿豹尾晚歲冠鰲頭夷

雅推簪橐清醇動冕旒居然似岐國只欠啟金甌

念昔登黃甲公時上玉堂焉知叨倖直尚及對批章二
紀光陰速三年別恨長懷賢已惆悵感舊更淒涼

次胡邦衡韻

乙未八月
十三日

右相虛來三見春都人日夜望平津驛騶開路雲霄逼
霖雨思賢鼎寫新赤縣尚多淪異域潢池猶自擾齊人

謂茶
寇

公如不為蒼生起風俗何由使再醇

從駕過德壽宮馬上得程泰之次庚寅玉堂舊

韻有銀章金帶之戲走筆為謝

乙未閏九月十七日

推猷也復從鳴鑾鳳詔詩盟故未寒兩制空煩舍人樣

僕近日告命及答詔皆年兄草

外郎爭比大夫官

僕官朝請郎年兄新轉大夫

翰林

今夜仍連直講殿明朝豈兩般畢竟五金如五味莫因黃白議醎酸

程泰之昨有金帶銀章之句十月二十八日乃

因押伴北使赤岸御筵服重金侍宴紫宸殿

坐間嘗作數語為戲後兩日復得其詩亦再

次韻 乙未

甚日重黃侍玉鑾幾時八座佩金寒

古詩云眼赤何時兩腰黃甚日重杜

工部云連枝不日並八座幾時除

殿庭屬目誇新貴

閤門官爭相問

部曲低頭

拜舊官

泰之嘗貳春官今復借大宗伯

五日尹京非細事四時仕宦固

多般

泰之今春服綠夏間階緋今借金紫真傳遊藝也

重行隔品詩仍健應笑

官卑語帶酸

次韻徐元敏權貨同年

乙未十一月

當年駕鶴共驂鸞對躡丹梯上廣寒綠鬃旋同依帥府

華顛今並列王官文才似我無多子契分于君有四般

唐人與同年詩
云契分四般同

念舊不妨頻枉駕
甕頭隨意酌甘酸

凌閣學景夏挽詩二首

乙未十
二月

南渡衣冠墜俄然氣象還
向微公數輩誰濟國多艱
劍履星辰上風流水石間
名高仍壽考天賦未全慳

聖上開皇極炎興纂異書
蒼葭依玉樹清水映汗渠
自爾音塵隔思公歲月除
佳城空在望無路祖喪車

韓子溫尚書以長句送江梅次韻

乙未

憶昔歸田友麋鹿雪裏尋梅踏瑤玉巡簷屢作杜陵笑
窮路幾為步兵哭忽逢綠衣髻如雲歌舞醉人睡昏昏
覺來但有風相襲夢斷初無香返魂豈知重見長安雪
喜極豐年簫鼓咽更讀裴公東閣詩仍分處士西湖月
皎如玉樹臨我傍幸同待漏靴滿霜但願和羹繼先業
不辭草制搜枯腸

來詩有和羹之句

邦衡侍郎留金陵再用津字韻賦詩謝送賜茗

復以丙中小春四鈐寄贈

乙未

淳熙又貢第三春驛騎新馳度劍津七祖師泉難話舊

謂青原

八功德水且嘗新雪庭烹處休裝景火閣煎時却

可人只恐春從官柳動

官柳邦衡侍婢名

樂天還欲醉精醇

唐朱

敬則傳醇精
流糟粕棄

聞西省賞醪醕巧樂戲成小詩奉簡泰之侍講

舍人年兄并以丁香橄欖百枚助筵却求殘

花數枝

丙申三月

羣玉園中作主人紫薇花底會佳賓風光總屬程夫子

好念文昌寂寞春

滿架冰肌合碧雲翻階翠袖映紅裙玉堂只有金沙在

伴直明朝又屬君

翰苑僅有此花
奉之明晚直宿

酒殢桐馬莫分甘金賜麟蹄敢搯尖紅白賞殘堪底用

雨中折贈未傷廉

日歷所進書賜
金及酒甚多

從來引玉即拋磚自笑囊空百不堪賴得酒酣須茗飲

聊將青子助回甘

新鎮江通判蔡湍挽詞

丙申四月二十四日
蔡哀曾孫

計相聲名久不磨慶餘豐報屬君多原鵠重遇非常主

君謨久任三司使
君弟今為戶書

庭鯉仍收最上科

君謨第十人及
第君子戲亦然但

使家聲常燁赫不辭官路獨蹉跎仁人天豈惜眉壽自

要曾門同逝波

君謨享年五十
六端亦五十六

次韻閻刑部才元楊梅

丙申

炎帝傘照濤江紅五月獻果明光宮越人一枝古所重

蜀無他楊譜則同

蜀中絕
無楊梅

玄珠更將赤水浴流火呈祥

復王屋不伴長安黑彈丸殺吏驚人寒起粟新詩字字

含芳鮮大書遺我敦同年請君速訪天竺老食白追繼

仇池仙

東坡寄天竺辨才詩云且食白楊梅蓋山中實有此果而蜀人註此詩者偶未知耳閬亦蜀人

六曹長貳觀潮予以入直不與晡時大雷雨走

筆戲蔡子平

丙申七月十九日

雷轟萬鼓勒潮回無復亭前雪作堆應為尚書慳且澁
盲風怪雨一時來

走筆答程泰之以簡問蓮社事

丙申七月二十六日

杏壇儼雅猶難考蓮社荒唐孰肯知好把鍾山為倣鑑

瞿昉留作晚年師

次韻天官韓尚書七月十八日風雨中觀潮予

內直不赴

丙申

禁直惟聞漏鼓催潮聲遙聽訝蚊雷忽傳傑句天邊得
如對洪濤海上來

大筆真能挾風雨小才何敢助涓埃古今奇觀須秋半
好約重銜伯雅杯

程泰之下直某偶被宣鎖相遇于途既到玉堂

讀所留佳句次韻為謝

丙申八月二十三日

天街並踏軟紅塵飛鞚交馳駿徼巡椒殿敢期當制草

槐庭元擬用儒真

初謂年兄入相故鎖院

驚方偶免冬龜手適市

深慚旦攫人早夜祝公登相位重霑潤筆乃無貧

慶東宮生辰二十韻

丙申

二聖仁無敵元良敬有加一丁昌火運

太上丁亥主上丁未殿下丁卯

三合聚皇家

陰陽家以亥卯未為三合

帝子初朱芾天孫更綠車東

儲今啟誦重慶鵲勛華異表溫而厲英辭正且葩日三

朝蠖護明兩照幽遐周鮑吾何嗜齋蒿爾自邪金昭全

粹質玉裕絕纖瑕唐範刊譌謬

恭親手校唐太宗帝範

丘經辨等

差

嘗蒙脩詢觀六經次第

虔心宗淡泊論樂鄙淫哇摘藻書盈軸

穿楊箭列數共知文武備頻拜聖人嘉盤露清承掌牕

風冷度紗佳辰奠四葉樂歲粟千秬呈瑞芝生草延年

菊試花震帷春不老鶴禁壽無涯喜氣均三殿恩頒出

正衙流香傳御酒七寶簇宮茶釘坐麟為脯堆盤棗勝

瓜子同生九月魯國謾多誇

洪景嚴樞密挽詞二首

丙申

兩制摛文壓縉紳三吳耀武見經綸
橋留震澤居無擾舟濟滄溟捷有神
宥府嘉猷推乃后陪都遺愛紀斯民
多才多藝無多壽此理憑誰問大鈞

召試曾叨對巨題代言今忝繼前規
豐鍾霜響人何在瓦釜雷鳴愧可知
滕駟啟城嗟有日徐鷄醢酒恨無期
玉堂賴有綸章在時展前篇慰所思

公嘗編中興制草

送蔡迨赴桂陽令

齊之後延慶曾孫

丙申十月十日

工部詩題滿劍川儀曹文筆照湘南身行蜀棧曾幽討
舟掛吳帆又飽參啼驥有心真自得拔茅無術定誰慙
金蘭正好追英彥蒲穀翻令試子男縣古荒祠憐義帝
地靈勝槩憶蘇耽冰臺小試醫民瘼帛幅高張律吏貪
衛颯化行先禮教

肩吾嘗著禮訓一十篇

次充美政是耕蚕故家

遺俗今無幾往行前言孰可談鴻鴈峯高書莫繫驪駒
歌闋酒中酣伊予已卜江湖隱靈壽何時寄草菴

丁酉二月二十日同部中諸公遊下竺御園坐

枕流亭觀放閘桃花數萬點隨流而下繼至
集芳亦禁蘖也海棠滿山郁李遶欄殆不類
人世間明日入部而桃花數枝伶俜窓外未
時內直則海棠郁李各一株方開遂賦二絕
句

萬點紅隨雪浪翻恍疑身到武陵源歸來上界多官府
人與殘花兩不言

清勝堂前花萬重玉堂署裏兩芳叢應憐寓直清無侶

聊伴衰翁宿禁中

魯季欽嘗數文挽詞二首

丁酉

競爽雲間陸同升天上張東堂聯折桂南省繼含香風
月三千首金絲十二行初終全五福似續付諸郎

自謄江南袂思公歲月徂書來懷棣萼老去重葭莩東
粵仍閩粵當湖遂鏡湖堂成隨一相浮世竟何須

宣州蔡子平尚書淑人居氏挽詞二首

丁酉
七月

八座夫人貴三刀刺史榮共深偕老慶忽寄悼亡聲寂

寔閨門政淒涼兒女情親交猶雪涕況乃謝宣城

鵷綴聞相藻鷁原泰附葭至今思並舍晚歲擬通家只
道身長健那知生有涯挽謳無好語聊雜墮頭笳

東宮出示和御製秋懷詩恭和二首

丁酉八月

某近者特蒙頒示御製秋懷詩繼出殿下和篇明良
相賡徵角交作猥緣幸會獲預榮觀蟋蟀候秋而吟
蓋亦不能自己謹成二篇繕寫投獻仰塵英鑑伏深
震懼

沛宮歌風雲威德加四海雄詞照千古編簡亦光彩惟

皇與同符興寄秋序改宸章振遠響寂寞暗衆籟有如

涼飈來殘暑去安在願言掃氛曠廓廓天宇大

右恭借
御製韻

寒露零太空清詩出少海昭融備萬象衆目眩符彩二

南可無愧一字不容改金聲玉振之遼邈慶宵籟

權德
輿答

楊河南書慶宵
天籟正聲鏗鏘

毫芒人間落神物護在在惟慙小儒情

未易識其大

右敬和
殿下韻

兵部宋尚書

延祖

挽詞二首

丁酉

北客今無幾公才合奮飛再期騫禁路仍世識途歸星
動尚書履霜留御史威桑榆初未逼何乃露先晞

識面嗟雖晚論心尚未央經帷叨並席官舍許連牆俶

訝親鍼石俄驚授印章

公上印之日
僕攝夏官

梅花佳句在無復

鉄心腸

中奉大夫直徽猷閣致仕邵及之挽詞二首

丁酉

廉甚仍知止高風似孔殘北歸垂橐日南省掛冠時清
白傳諸子安閑閱十期今誰主文字好繼退之碑

不殖千金產惟求十畝園湖山堆几席花木報寒暄曾
是尊前客常思醉後言懷賢空有淚無路灑新原

走筆次李仁甫夜直觀月韻二首

丁酉

殿中延拜二卿真腰下初橫寶帶新便有堂封佳識在

移卮恰趁謝恩人

仁甫正謝日適二參政同過局置酒省中

玉堂清冷夢難頻月姊高寒遠莫親伴直徑須呼苦酒

不應覓句調他人

仁甫專飲苦酒

九月二十二日曲宴御詩

丁酉

昊穹垂祐福群生涼德惟知儉守成禾黍三登占叶氣
簫韶九奏播歡聲未央秋晚林塘靜太液波閒殿閣明
嘉與臣隣同宴樂益修庶政答昇平

臣恭和御製晚秋曲宴近體詩一首繕寫投進
冒瀆天威臣無任戰懼俟罪之至

宸遊不為菊叢生觀宴元因穀順成閣御芙蓉稱曼壽
殿開選德奏和聲玉觴未飲心先醉寶墨遙瞻眼倍明
身在金坡空感遇論思深愧策平平

初上壽芙蓉閣
移宴選德殿

李仁甫賦詩送其子塾下第歸次韻為贈

丁酉九月

餘力猶能誦稗官，奧篇隱帙復何難。
求賢正市千金駿，當賦終徵百羽搏。

搏徒官切

喚渡吳江秋水漲，解鞍蜀道雪

山寒歸來趁賀新郎罷東閣重尋一笑歡。

慶東宮生辰四首

丁酉九月三日

某伏觀崔豹古今注東漢時樂人作歌詩四章以贊
太子之德一曰日重光二曰月重輪三曰星重輝四
曰海重潤舊說云天子之德光明如日規輪如月重

輝如星霑潤如海太子皆比德故云重也每恨其辭
不傳于世茲者恭遇皇太子殿下吹銅令旦輒補四
章仰祝無窮之壽冒塵英覽伏增戰汗

太陽象真主陽明應誕期

爾雅十月為陽

少陽比儲君生近重

陽時明兩蓋自然何待卦畫知形容謾辭費詠取重光

詩

右曰重光

崔豹稱明君如月有規輪戴暈論副德桂滿自長春

梁戴

暈月重輪云皇基屬明兩副德表重輪重輪非是暈桂滿自長春

况乃秋夜永萬里無

織塵願歌重輪句照耀率土濱

右月重輪

季秋日在房房心乃明堂煌煌心前星于茲侍天王休

符協上象九月誕元良太史言有証重暉照無疆

右星重暉

舊聞西北海巍然峙搖山高辛賢太子制樂山之間坐

閱幾春秋不老常朱顏至今重其潤恩波浹人寰

右海重潤

送喻宮教良能出倅會稽

拾遺羈旅鑑湖秋太史崎嶇禹穴游只駕貳車良自足
更營三釜復何求千山徧踏詩才富萬壑臨觀史筆遒

稍待政成歸魏闕便從麟閣上螭頭

叔奇能詩所至輒賦近當進歷代忠

義傳極有史法

恭和御製賜史浩古詩

丁酉十一月

臣伏蒙睿慈頒示御製賜史浩古詩三十韻臣恭依
聖訓賡續進呈效涓塵于海嶽之間何裨廣大曳螢
燭于日月之下或借光輝冒犯天顏臣無任戰慄之
至

粵從三代還歲月過千禩時豈無賢君道未契宸旨煌

煌唐太宗勲業在所喜冠攘既掃除蠻貊畢至止循良
布郡邑惠政寬獄市忠賢儼班聯切諫杞浮靡關輔羅
府兵巖穴聘奇士民生覆孟安國勢太山倚皇心期過
之風下九萬里忠厚培本根文物粲華藻淳熙視正觀
何啻相表裏屬車尚濤江列漳隔淮水蠹茲獯鬻氏作
我太清澤坐令營屯衆久費糗糧峙中原厭狼貪諸將
空虎視安得貫硃楮來貢尺有咫六合混一家耕桑盛
生齒願言講治道先務當有幾欲仁斯仁至惠在未舉

趾而況前史中遺事可尋理衛英爪與牙王魏目兼耳
處中賴房杜虛受忘彼此不聞國異政但見車同軌孰
云古道難僉曰今王是寸陰勝所兢盛德日方起舞干
格三苗其效七旬耳軻稱仁無敵傳謂禮可已東韞及
北狄會見朝玉帛南山竹易殫陛下功難紀儒館謾獻
歌將乃詞之體

靖州張推官庭傑挽詞

丁酉十一月

青綬當年謾被緇力將儒素換豪華篋中深貯先賢傳

門外常停長者車有子留畬在經訓平生痼疾是烟霞
花橋卜築花山殯太息中吳好事家

端明尚書汪聖錫挽詞二首

丁酉十二月

性與天真合心惟聖處求有書皆默記無事不冥搜相
業期黃髮祠官恃黑頭為霖幾人望誰料倏成休

刻意追元祐斯文未喪予前生陳正字今代傳中書太

末分攜晚東膠覲面初追思二十載痛哭淚盈裾

乾道庚寅

六月見公姑蘇常語某云幼讀陳後山集見代人乞郡
劉子便能成誦且知其為傳簡獻公作後檢傳集果有

之公豈其
後身歟

秋官少常伯失杯復得乃好客之報來詩誤認

天意遂欲因噎廢食走筆次韻發笑

程泰之也來詩

謂不合款客自此雖及
門亦不納以順天意 丁酉

郭釜知藏幾百杯韋籬何止一尊壘冶金太盛應須躍
塞馬重歸豈是災車到門前如可却客來梁上若為回
遂疑同舍真疎矣明與劉义亦壯哉

文忠集卷六